

MESYUARAT PERTAMA, PENGGAJAL KELIMA  
PARLIMEN KEEMPAT BELAS  
2022

**HARI SELASA : 15 MAC 2022**

**JAWAPAN-JAWAPAN BAGI PERTANYAAN-PERTANYAAN JAWAB  
LISAN YANG TIDAK DIJAWAB DI DALAM DEWAN  
( SOALAN NO. 13 HINGGA NO. 73 )**

**NOTA : [RUJUK PENYATA RASMI HARIAN (HANSARD)]**

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : TUAN YUSUF BIN ABD. WAHAB  
[ TANJONG MANIS ]**

**TARIKH : 15 MAC 2022 (SELASA)**

**SOALAN 13**

**TUAN YUSUF BIN ABD. WAHAB [ TANJONG MANIS ]** minta **MENTERI PERTANIAN DAN INDUSTRI MAKANAN** menyatakan berapa jumlah bantuan perahu dan enjin kepada para nelayan di Parlimen Tanjong Manis. Adakah bantuan ini masih diteruskan pada tahun ini.

**JAWAPAN**

**Tuan Yang di-Pertua,**

Untuk makluman Ahli Yang Berhormat, di bawah Program Dana Nelayan, Kementerian menyediakan bantuan pinjaman mudah bagi pembelian bot dan peralatan baharu atau untuk meningkatkan keupayaan bot sedia ada. Bagi tahun 2022, sejumlah RM4.5 juta telah diperuntukkan bagi negeri Sarawak untuk tujuan ini dan sehingga Februari 2022, sejumlah RM631,000 telah diluluskan permohonan melibatkan 31 orang nelayan.

Bagi Parlimen Tanjong Manis, dari tahun 2002, sejumlah RM1,165,950.00 telah disalurkan kepada nelayan dan Persatuan Nelayan di sana. Daripada jumlah tersebut, pinjaman sebanyak RM612,300.00 telah diberikan kepada nelayan dan RM553,650.00 kepada Persatuan Nelayan. Seramai 40 nelayan dan 3 Persatuan Nelayan telah menerima manfaat daripada program bantuan pinjaman ini. Bantuan pinjaman yang telah diberikan adalah untuk pembaikan kulit vesel, naiktaraf enjin seta peralatan-peralatan menangkap ikan yang lain seperti pelampung, tali pukat, *power block* dan lain-lain.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

---

**PERTANYAAN : JAWAB LISAN**

**DARIPADA : YB TUAN SIVAKUMAR VARATHARAJU  
NAIDU [ BATU GAJAH ]**

**TARIKH : 15 MAC 2022 (SELASA)**

**SOALAN**

**Tuan Sivakumar Varatharaju Naidu [ Batu Gajah ]** minta **MENTERI PEMBANGUNAN WANITA, KELUARGA DAN MASYARAKAT** menyatakan langkah-langkah proaktif yang akan diambil oleh Kerajaan untuk menguruskan jumlah warga emas yang semakin meningkat. Malaysia dijangka mencapai status 'negara tua' menjelang tahun 2030 apabila 15.3% daripada populasinya berumur 60 tahun dan ke atas. Nyatakan sama ada Kumpulan Wang Simpanan Pekerja (KWSP) sudah bersedia dan apakah strateginya untuk menghadapi fenomena ini.

**JAWAPAN**

Tuan Yang di-Pertua,

Sebagai salah satu organisasi keselamatan sosial yang berperanan penting dalam memastikan rakyat mempunyai jaminan pendapatan untuk hari tua, KWSP telah merancang dan memperkenalkan pelbagai strategi dan inisiatif bagi membantu ahli mempunyai simpanan persaraan yang mencukupi apabila bersara kelak. Inisiatif tersebut adalah seperti berikut:

- i. pengeluaran Umur 55 Tahun dan Pengeluaran Umur 60 Tahun yang lebih fleksibel;
- ii. tempoh tanggungan mencarum iaitu ahli dan majikan wajib mencarum adalah sehingga umur 75 tahun;
- iii. bagi menggalakkan ahli terus kekal aktif bekerja dan majikan mengambil pekerja berumur 60 tahun dan ke atas, KWSP tidak mengenakan apa-apa caruman kepada pekerja, manakala, kos majikan dikurangkan di mana caruman wajib hanya sebanyak 4%;
- iv. memperkenalkan i-Saraan;
- v. Memperkenalkan Kasih Suri Keluarga Malaysia (dahulunya dikenali sebagai 'i-Suri');
- vi. memperkenalkan pengeluaran baharu pada tahun ini untuk membolehkan ahli membeli produk insurans atau takaful, seperti yang diumumkan dalam Belanjawan 2021;
- vii. KWSP turut menyediakan pelbagai saluran untuk ahli dalam sektor formal menambah simpanan persaraan mereka; dan
- viii. caruman sukarela boleh dibuat oleh mana-mana pekerja sektor formal, orang yang bekerja sendiri dan mereka yang tidak bekerja seperti pelajar dan suri rumah sehingga RM60 ribu setahun

Selain itu, KWSP juga mempunyai langkah-langkah mengembalikan dan meningkatkan simpanan ahli KWSP, perkhidmatan khidmat nasihat KWSP, panduan Perbelanjaan Belanjawanku dan *My Money Matters*. Kesimpulannya, terdapat pelbagai usaha dan strategi yang telah dijalankan oleh KWSP. KPWKM menyokong penuh usaha KWSP dalam persediaan Malaysia menuju ke status negara tua pada tahun 2030.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : TUAN ABDUL LATIFF BIN ABDUL RAHMAN  
( KUALA KRAI )**

**TARIKH : 15 MAC 2022 (SELASA)**

**SOALAN**

**TUAN ABDUL LATIFF BIN ABDUL RAHMAN (KUALA KRAI)** minta **MENTERI TENAGA DAN SUMBER ASLI** menyatakan apakah langkah susulan Kementerian setelah Rang Undang-Undang Harta Pusaka Kecil (Pembahagian) (Pindaan) 2021 diluluskan oleh Parlimen agar hasrat untuk mempermudah rakyat mendapat perkhidmatan pengurusan pusaka yang ditawarkan Kerajaan dapat direalisasikan.

**JAWAPAN**

Tuan Yang di-Pertua,

Susulan Rang Undang-Undang Harta Pusaka Kecil (Pembahagian) (Pindaan) 2021 yang telah diluluskan oleh Parlimen, Kementerian telah mengambil tindakan berikut:

- i) perkenan oleh Kebawah Duli Yang Maha Mulia Seri Paduka Baginda Yang di-Pertuan Agong telah diperolehi pada 25 Januari 2022;
- ii) memuktamadkan gubalan Peraturan-peraturan (Rules) sebelum diangkat untuk pandangan dan kelulusan Jabatan Peguam Negara;
- iii) kajian bagi memperkasa dan mengukuhkan peranan Bahagian Pembahagian Pusaka;
- iv) mengadakan sesi libat urus di peringkat Kementerian dan Jabatan dengan pentadbiran tanah Kerajaan Negeri-Negeri bagi mewujudkan kerjasama membantu penyelesaian tunggakan kes pusaka. Melalui tindakan ini pasukan task force diwujudkan dengan kerjasama daripada Kerajaan-kerajaan Negeri. Pada masa yang sama, Klinik Penyelesaian Tunggakan Kes Pusaka telah dimulakan di Negeri Kedah pada 14 Februari 2022; dan



- v) mengemukakan permohonan kepada Kementerian Kewangan dan Jabatan Perkhidmatan Awam bagi pengambilan perjawatan secara kontrak. Ini adalah sebagai langkah jangka sederhana untuk menyelesaikan tunggakan sedia ada dan permohonan semasa dapat ditangani sebelum pindaan Akta Harta Pusaka Kecil (Pembahagian) 1955 [Akta 98] dikuatkuasakan. Sebagaimana dimaklumi, pindaan tersebut turut melibatkan peningkatan bidangkuasa harta pusaka kecil demi kemudahan kepada rakyat.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA 2022, PENGGAL KELIMA,  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : YB TUAN SYED IBRAHIM BIN SYED NOH  
[LEDANG]**

**TARIKH : 15 MAC 2022 (SELASA)**

**SOALAN**

**TUAN SYED IBRAHIM BIN SYED NOH [LEDANG]** minta **MENTERI KOMUNIKASI DAN MULTIMEDIA** menyatakan secara terperinci rasional keputusan Kementerian memilih kaedah '*Single Wholesale Network*' bagi inisiatif 5G dan status rundingan atau perjanjian Digital Nasional dengan syarikat-syarikat pembekal telekomunikasi.

**JAWAPAN**

Tuan Yang Dipertua,

Kerajaan telah melaksanakan kaedah *Single Wholesale Network* (SWN) dengan mengambil kira perkara-perkara seperti berikut:

- (i) mempercepatkan pelaksanaan rangkaian 5G di Malaysia;
- (ii) memastikan kos pelaksanaan yang lebih rendah bagi mendorong caj perkhidmatan yang lebih rendah;
- (iii) merealisasikan potensi 5G di Malaysia untuk merangsang aktiviti ekonomi;
- (iv) mengelakkan pembaziran berikutan pertindihan infrastruktur dan mengoptimumkan penggunaan sumber yang sedia ada;
- (v) menggalakkan persaingan berasaskan perkhidmatan dalam industri komunikasi.

Kerajaan juga telah mengenal pasti bahawa ketersediaan 5G merupakan salah satu indikator dan asas kepada Rangka Tindakan (*Blueprint*) Ekonomi Digital Malaysia. Dalam masa yang sama, keperluan pelaburan untuk menambah baik rangkaian 4G sedia ada juga perlu diberi pertimbangan kerana terdapat peningkatan mendadak kebergantungan perkhidmatan atas talian yang berpunca daripada pandemik COVID-19. Setelah mengambil kira faktor-faktor yang dinyatakan di atas, pendekatan SWN merupakan kaedah yang sesuai untuk pelaksanaan 5G negara.

Digital Nasional Berhad (DNB) selaku pelaksana SWN sedang melaksanakan penyediaan rangkaian 5G mengikut perancangan yang telah dibuat. DNB telah mencapai sasaran bagi Fasa 1A pada tahun 2021 iaitu menyiapkan 500 tapak 5G meliputi kawasan sekitar Putrajaya, Cyberjaya dan Kuala Lumpur dan memulakan akses kepada perkhidmatan rangkaian borong mereka pada 15 Disember 2021 lalu.

Peluasan rangkaian 5G diteruskan dalam Fasa 1B dengan sasaran 3,518 tapak bagi tahun 2022, yang akan melibatkan kawasan Lembah Klang dan bandar-bandar utama di Johor, Melaka, Negeri Sembilan, Perak, Pulau Pinang, Sabah dan Sarawak.

Setakat ini, YTL Communications (YTLC) dan Telekom Malaysia (TM) merupakan dua syarikat yang telah mendapatkan akses daripada DNB. Mereka juga sedang bekerjasama rapat dengan DNB mengoptimumkan kualiti perkhidmatan 5G kepada pengguna.

Bagi status rundingan pihak DNB dengan syarikat-syarikat pemberi perkhidmatan yang lain, perbincangan teknikal sedang diteruskan. Rundingan komersial pula sedang menunggu dokumen Tawaran Akses Rujukan (RAO) dimuktamadkan oleh DNB dan diluluskan oleh Suruhanjaya Komunikasi dan Multimedia Malaysia, yang dijangka selesai dalam bulan Mac 2022. Setelah RAO diterbitkan, rundingan komersial dan perjanjian akses borong baru dapat dilaksanakan.

Pada masa yang sama, berdasarkan maklum balas yang diterima daripada pelbagai pihak berkepentingan, Kerajaan telah menilai model-model pelaksanaan rangkaian 5G yang lain sekiranya terdapat model yang lebih baik berbanding model SWN yang diguna pakai pada masa ini.

Memorandum Jemaah Menteri berkenaan hala tuju model pelaksanaan rangkaian 5G telah dibentangkan pada 11 Mac 2022 dan keputusan mengenai perkara ini akan diumumkan melalui satu sidang media oleh YB Menteri Kewangan bersama YB Menteri Komunikasi dan Multimedia yang dijadualkan akan diadakan pada 16 Mac 2022.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DATUK HAJI SHABUDIN BIN YAHAYA  
[ TASEK GELUGOR ]**

**TARIKH : 15 MAC 2022 (SELASA)**

**SOALAN**

**DATUK HAJI SHABUDIN BIN YAHAYA [ TASEK GELUGOR ]** minta **MENTERI PELANCONGAN, SENI DAN BUDAYA** menyatakan berapa bilangan pengusaha batik tradisional di Terengganu dan Kelantan serta apakah langkah diambil bagi memastikan industri cetakan batik terus mampu bertahan di sebalik kemasukan batik dari luar negara seperti India dan Indonesia.

**JAWAPAN**

**Tuan Yang di-Pertua,**

1. Usaha membangun dan memperkasakan industri kraf batik tempatan sentiasa dilaksanakan oleh Kementerian Pelancongan, Seni dan Budaya (MOTAC) dan agensinya Perbadanan Kemajuan Kraftangan Malaysia (Kraftangan Malaysia) agar ia terus mapan dan berdaya saing, seterusnya membawa industri kraf batik ke tahap yang lebih baik.
2. Pada tahun 2021, seramai 1,931 orang usahawan dan 5,498 tenaga kerja telah berdaftar dengan Kraftangan Malaysia dalam bidang kraf tekstil. Daripada jumlah tersebut, seramai 135 orang usahawan dengan 706 tenaga kerja di Terengganu manakala seramai 338 orang usahawan dengan 2,003 tenaga kerja mengusahakan industri ini di Kelantan. Jualan kraf batik yang dijana bagi kedua-dua negeri ini adalah berjumlah RM38.4 juta.
3. Pelbagai langkah diambil dalam memastikan industri batik terus bertahan di Malaysia dalam persaingan dengan produk batik dari negara luar. Antara langkah-langkah yang dilaksanakan termasuklah:

(i) Pengisytiharan Hari Batik Malaysia

Pengisytiharan Hari Batik Malaysia yang disambut pada 3 Disember setiap tahun telah diumumkan oleh Yang Amat Berhormat Perdana Menteri Malaysia pada 1 Disember 2021. Dengan pengisytiharan ini, ia mampu memartabat dan memperkasakan industri kraf batik negara. Usahawan dan komuniti kraf batik merupakan golongan yang memperoleh manfaat daripada pengisytiharan ini, selain dapat turut memberi suntikan semangat dalam melahirkan lebih ramai usahawan dan komuniti batik yang kreatif dan inovatif. Pengisytiharan ini juga dapat melonjakkan permintaan terhadap produk batik sekali gus memastikan industri ini terus lestari.

## SOALAN NO : 17

### (ii) Bantuan Rekaan Baharu dan Penggunaan Bahan dan Teknik Baharu

Bantuan rekaan baharu dan penghasilan prototaip bertujuan untuk memastikan kepelbagaian produk batik ditawarkan di pasaran. Pada tahun 2021, sebanyak 727 rekaan produk batik dan 532 prototaip produk baharu telah dihasilkan.

Di samping itu, penghasilan kajian dan teknik baharu bagi memastikan penawaran produk batik yang lebih berkualiti dan memenuhi kehendak pengguna juga dijalankan secara berterusan. Pada tahun 2021, sebanyak 2,409 sampel kajian bahan dan teknik proses batik berjaya dihasilkan. Antaranya kajian bahan dan teknik gantian halangan bahan linut dan *clay*, kajian bahan dan teknik cetakan kreatif (*eco print*) serta kajian bahan dan teknik terhadap bahan tempatan dan semulajadi sebagai resin.

Inovasi ini menghasilkan teknik dan rekaan yang unik dan eksklusif. Kesemua produk batik eksklusif ini turut diperkenalkan kepada umum pada Festival Kraf Tekstil Pantai Timur dan di Hari Kraf Kebangsaan yang berlangsung baru-baru ini.

### (iii) Program Kemahiran dan Peningkatan Kemahiran (PENJANA)

Program Pembangunan Perantisan Kemahiran (PPPK) dan Program Pembangunan Kemahiran Komuniti (PPKK) di bawah PENJANA dilaksanakan melalui empat (4) inisiatif utama iaitu Pembangunan Produk, Pembangunan Komuniti Kraf, Pasaran dan Promosi serta Komunikasi Pasaran Bersepadu. Pada tahun 2021, PPKK bagi industri batik telah membabitkan penyertaan lebih 1,400 orang daripada komuniti di seluruh negara yang melibatkan 98 aktiviti kemahiran teknikal serta penjana nilai jualan kraf berjumlah lebih RM360,000.

(iv) PENJANA 2.0

Program ini merupakan kesinambungan kepada program PENJANA 1.0 dengan memberi kemudahan latihan tenaga kerja baharu yang terdiri daripada belia, penganggur dan individu yang terkesan akibat wabak pandemik COVID-19 serta kursus keusahawanan dan pemasaran diberikan kepada peserta. Pada tahun 2021:

- (a) Seramai 36 orang peserta daripada bidang batik telah mendapat latihan kemahiran selama 6 bulan bermula Ogos 2021 bersama usahawan kraf yang terpilih;
- (b) Sebanyak lapan (8) kursus telah diadakan dengan penyertaan seramai 25 orang usahawan batik;
- (c) Inisiatif Pendigitalan Kraf diperkasakan dengan memasarkan produk kraf batik menerusi platform digital menerusi E-Kraf Bazar, MYCRAFTSHOPPE dan Program *Virtual* Hari Kraf Kebangsaan. Manakala seramai 473 orang usahawan kraf tekstil termasuk batik telah berdaftar di bawah *CraftOnTheGo* dan akan terus dipergiatkan pada tahun 2022;
- (d) Dalam usaha membantu memulihkan industri pelancongan dan kebudayaan yang terjejas kesan daripada pandemik COVID-19, Kraftangan Malaysia menyediakan insentif baucar tunai sebanyak RM30 bagi setiap gandaan RM100 pembelian produk kraf sebagai galakan kepada orang ramai membeli produk kraf terutamanya batik. Langkah ini dapat membantu meningkatkan jualan dan pendapatan usahawan kraf batik di samping produk kraf yang lain. Baucar ini boleh digunakan di Program Promosi anjuran Kraftangan Malaysia, *outlet* Karyaneka, pusat jualan dan galeri di cawangan negeri Kraftangan Malaysia dan Kompleks Kraf serta platform atas talian (MYCRAFTSHOPPE dan Karyaneka); dan



## SOALAN NO : 17

- (e) Promosi kraf secara fizikal turut dilaksanakan bagi memberi lebih *visibility* dan pendedahan batik kepada orang ramai. Antaranya seperti di Hari Kraf Kebangsaan (HKK 2022) yang telah dianjurkan secara fizikal dari 23 Februari 2022 sehingga 7 Mac 2022 baru-baru ini.

4. Secara keseluruhannya, MOTAC melalui Kraftangan Malaysia sentiasa berusaha dalam mempertahankan usahawan kraf batik termasuk produk-produk kraf yang lain bagi memastikan industri ini terus kekal lestari dan mampu bertahan serta bersaing dengan produk-produk batik dari negara luar.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KE EMPAT BELAS**

---

**PERTANYAAN : LISAN**

**DARIPADA : TUAN HASSAN BIN ABDUL KARIM  
[ PASIR GUDANG ]**

**TARIKH : 15 MAC 2022 (SELASA)**

**SOALAN**

**TUAN HASSAN BIN ABDUL KARIM ( PASIR GUDANG )** minta **MENTERI PERTANIAN DAN INDUSTRI MAKANAN** menyatakan apakah usaha Kementerian untuk membantu nelayan-nelayan tradisional di Pasir Gudang yang menangkap ikan dan menternak kupang di Selat Johor yang bersempit dengan Pulau Singapura.

**JAWAPAN**

**Tuan Yang di-Pertua,**

Kementerian komited memberikan pelbagai bantuan kepada nelayan-nelayan termasuklah di Pasir Gudang seperti berikut:

- i. Elaun Sara Hidup Nelayan;
- ii. Program Khas Perumahan Nelayan (PKPN);
- iii. Subsidi Diesel dan Petrol kepada nelayan;
- iv. Skim Tabung Bantuan Bencana Alam dan Kebajikan Nelayan;  
Program Pembangunan Pelan Peningkatan Pendapatan Golongan B40: Nelayan Melalui Projek Tanaman Kontan;
- vii. Program Pembangunan Kumpulan Nelayan;
- viii. Program Pasar Nelayan;
- ix. Dana Nelayan (SNEP); dan
- x. *Fisheries Transformation Center* (FTC) di Pasir Gudang Baru yang berperanan sebagai pusat aktiviti bagi komuniti perikanan setempat.

Bagi membantu penternak-penternak kupang di Pasir Gudang, antara bantuan yang disalurkan adalah:

- i. peruntukan sejumlah RM348 ribu telah diluluskan secara *one-off* bagi Negeri Johor pada tahun 2021 di bawah Dana Jaminan Makanan (DJM) dengan bilangan penerima manfaat seramai 52 orang; dan
- ii. pemberian bantuan secara *in kind* iaitu sistem ternakan kupang jenis rawai, *p-line* dan *smartline*, mesin pembersih kupang dan rawai tradisi di Selat Johor.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : TUAN ANYI NGAU [ BARAM ]**

**TARIKH : 15 MAC 2022 (SELASA)**

**SOALAN**

**TUAN ANYI NGAU [ BARAM ]** minta **MENTERI KANAN PENDIDIKAN** menyatakan jadual serta status pelaksanaan projek menaik taraf sekolah daif seperti SK Beluru Sentral, SK Lapok, SK Long Bemang, SK Long Pelutan dan lain-lain sekolah yang dinaik taraf di kawasan Baram.

**JAWAPAN**

**Tuan Yang di-Pertua,**

Kementerian Pendidikan Malaysia (KPM) komited dalam menyediakan infrastruktur pendidikan yang selamat dan kondusif untuk kegunaan murid dan warga sekolah di seluruh negara termasuk negeri Sarawak.

Untuk makluman Ahli Yang Berhormat, terdapat sebanyak 21 projek naik taraf dan membangunkan semula bangunan daif di sekolah telah diluluskan di Parlimen Baram. Daripada jumlah berkenaan, sebanyak lapan projek telah siap, empat projek dalam pembinaan dan sembilan projek dalam peringkat pra bina. Khusus bagi SK Beluru Sentral, SK Long Lapok, SK Long Bemang, SK Long Pelutan, statusnya adalah seperti berikut:

**i. SK Beluru Sentral**

Projek sekolah ini telah diluluskan di bawah peruntukan RM1 bilion fasa 1 tahun 2019. Sehingga 31 Januari 2022, projek ini berada dalam peringkat pembinaan dengan kemajuan fizikal sebanyak 22.74 peratus. Projek dijangka dapat disiapkan pada bulan Mac 2023.

**ii. SK Long Lapok**

Projek sekolah ini telah diluluskan di bawah *Rolling Plan* 4 (RP4), Rancangan Malaysia Ke-11 tahun 2019. Sehingga 31 Januari 2022, projek ini berada dalam peringkat pembinaan dengan kemajuan fizikal sebanyak 21.81 peratus. Projek dijangka siap pada bulan Mac 2023.

**iii. SK Long Bemang**

Projek sekolah ini telah diluluskan di bawah peruntukan RM1 bilion fasa 2 tahun 2020. Sehingga 31 Januari 2022, projek sedang dalam proses penyediaan dokumen tender dan dijangka akan dapat ditender pada April 2022.

**iv. SK Long Pelutan**

Projek sekolah ini telah diluluskan di bawah peruntukan RM1 bilion fasa 1 tahun 2019. Sehingga 31 Januari 2022, projek berada dalam peringkat pembinaan dengan kemajuan fizikal sebanyak 10.27 peratus. Projek dijangka akan dapat disiapkan pada bulan Mei 2023.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KE-EMPAT BELAS**

**PERTANYAAN : JAWAB LISAN**

**DARIPADA : YB TUAN LOKE SIEW FOOK  
( SEREMBAN )**

**TARIKH : 15 MAC 2022 ( SELASA )**

**SOALAN NO. 20**

**TUAN LOKE SIEW FOOK [ SEREMBAN ]** minta **MENTERI PENGANGKUTAN** menyatakan secara terperinci jumlah pendapatan hasil dalam pendaftaran nombor Kenderaan semenjak sistem “E-Bid” JPJ mula dilaksanakan dan sama ada sistem tersebut berjaya meningkatkan hasil kerajaan.

**JAWAPAN**

**Tuan Yang di-Pertua,**

1. Pelaksanaan JPJeBid telah bermula dari 15 April 2019 dan sehingga 21 Februari 2022, JPJ telah berjaya mengutip hasil sebanyak RM446,816,194 melalui 322 siri bidaan yang telah selesai.
2. Sistem JPJeBid ini telah mendapat sambutan yang tinggi daripada orang awam dengan jumlah pengguna seramai 675,453 orang dan ukuran prestasi kutipan hasil persiri telah melonjak daripada RM1.15 juta pada tahun 2019 ke RM2.04 juta pada Februari 2022.
3. Melalui data-data ini terbukti keberkesanan pelaksanaan sistem JPJeBid dalam meningkatkan kualiti kecekapan perkhidmatan penawaran nombor pendaftaran kenderaan kepada orang awam secara amnya dan meningkatkan hasil Kerajaan secara khususnya di samping menekankan aspek integriti melalui digitalisasi.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

---

**PERTANYAAN : JAWAB LISAN**

**DARIPADA : YB DATO' SERI DR. WAN AZIZAH WAN  
ISMAIL [ PANDAN ]**

**TARIKH : 15 MAC 2022 (SELASA)**

**SOALAN**

**Dato' Seri Dr. Wan Azizah Wan Ismail [ Pandan ]** minta **MENTERI PEMBANGUNAN WANITA, KELUARGA DAN MASYARAKAT** menyatakan adakah JKM akan meneruskan projek rintis Pembayaran Bantuan Bulanan JKM Secara Tanpa Tunai ke seluruh negara kerana pelaksanaannya menafikan hak golongan OKU dan tanpa melibatkan sebarang sesi libat urus dengan organisasi OKU.

**JAWAPAN**

Tuan Yang di-Pertua,

Kementerian Pembangunan Wanita, Keluarga Dan Masyarakat (KPWKM) melalui Jabatan Kebajikan Masyarakat (JKM) sedang melaksanakan satu inisiatif baru iaitu **projek Bayaran Bantuan Kewangan Tanpa Tunai (Cashless) atau dikenali sebagai JKMPay**. Projek ini berstatus **PROJEK RINTIS** dilaksanakan ke atas **penerima bantuan kelulusan baharu sahaja dan tidak melibatkan penerima bantuan sedia ada**. Skim bantuan kewangan yang terlibat adalah semua skim bantuan bulanan Persekutuan.

Tuan Yang di-Pertua,

Projek ini dilaksanakan dengan tujuan berikut :

- i) **Memperluaskan mekanisme kaedah pembayaran** bantuan kewangan JKJ melalui kaedah bayaran ke bank dan juga kaedah tanpa tunai;
- ii) **Membantu penerima bantuan untuk mengurus dan mengawal perbelanjaan** wang bantuan secara berhemah dan bermanfaat;
- iii) **Memastikan penerima bantuan dapat memenuhi keperluan asas harian** khususnya melibatkan keperluan makan, minum, ubat-ubatan asas dan keperluan harian rumah;
- iv) **Memperkuhkan kolaborasi di antara Kerajaan dan pihak swasta** dalam meningkatkan perkhidmatan agensi di bawah kementerian;
- v) Menyokong ke arah **mewujudkan masyarakat digital selaras dengan Rangka Tindakan (Blueprint) Ekonomi Digital Malaysia 2021** dan Memacu Transformasi Perkhidmatan Digital Sektor Awam melalui kerjasama Sektor Korporat ;
- vi) **Memacu Transformasi Perkhidmatan Digital Sektor Awam** dalam menyediakan kaedah pembayaran tanpa tunai sebagai pilihan kaedah transaksi yang lebih berkesan dalam perkhidmatan yang di tawarkan; dan

- vii) **Menggalakkan penglibatan penerima bantuan dalam transaksi digital** agar tidak ketinggalan dalam era digital.

Di samping itu, projek ini juga sejajar dengan hala tuju baharu bantuan sosial di bawah Majlis Perlindungan Sosial Malaysia (MySPC) yang memfokuskan agar semua bantuan di masa hadapan hendaklah **bersyarat, mempunyai Dasar Pemisah (*Exit Policy*) yang jelas dan kesegeraan dalam pengagihan/pemprosesan bantuan.**

JKMPay telah dilaksanakan secara rintis mulai bulan Februari 2021. Setiap lokasi projek rintis dilaksanakan, Kementerian **telah melakukan kunjung hormat dan libat urus bersama Kerajaan Negeri** bagi menjelaskan mengenai projek rintis ini. **Peserta-peserta juga telah diberikan taklimat** bagi penggunaan kad dan aplikasi agar mereka memahami konsep tanpa tunai dan bagi membimbing mereka dalam penggunaan JKMPay. **Sehingga Februari 2022 sejumlah 4,752 peserta dari 6 negeri dan 23 daerah** terlibat iaitu Perlis (693 peserta), Kedah (2,661 peserta/semua daerah [12 daerah]), Melaka (924 peserta/semua daerah [3 daerah]), Terengganu (255 peserta [3 daerah]), Kelantan (180 peserta [2 daerah]) dan Selangor (39 peserta [2 daerah]).

Tuan Yang di-Pertua,

Sebagaimana yang telah dinyatakan sebelum ini, projek rintis ini hanya dilaksanakan kepada **PENERIMA BAHARU** bantuan bulanan JKM sahaja manakala 519,409 penerima bantuan bulanan sedia ada masih kekal menerima bantuan bulanan melalui bayaran ke akaun bank. **Penerima baharu juga kekal menerima kesemua jumlah keseluruhan bantuan yang diluluskan secara 100%.** Sebagai contoh, bagi seorang OKU penerima Elaun Pekerja OKU (EPOKU) yang melepasi syarat kelayakan bekerja dengan pendapatan di bawah RM1,500 sebulan, akan layak menerima bantuan EPOKU berjumlah RM450 sebulan. Sekiranya gaji penerima berjumlah RM1,300 dan ditambah EPOKU berjumlah RM450 yang dibayar 50% melalui bank atau RM225 dan 50% atau RM225 secara JKMPay, maka penerima masih mempunyai baki berjumlah RM1,525 secara tunai di bank dan masih boleh digunakan bagi

tujuan kegunaan pelbagai seperti bayaran sewa rumah, tambang pengangkutan, pembelian secara dalam talian dan lain-lain.

Manakala 50% (RM225) bayaran secara tanpa tunai di Kad JKMPay ini boleh digunakan oleh penerima untuk melaksanakan pelbagai transaksi seperti berikut:

1. Membuat transaksi tanpa tunai di mana-mana kedai runcit, kedai farmasi, kedai makan yang menyertai program tanpa tunai. Semua barangan di dalam kedai berkenaan boleh dibeli seperti:
  - i) Semua jenis keperluan bahan makan dan minuman seperti beras, gula, sayuran, minyak, ikan, ayam, sardin dan lain-lain;
  - ii) Barang keperluan kegunaan harian seperti lampin bayi, tuala wanita, bahan pencuci dan lain-lain; dan
  - iii) Keperluan ubat-ubatan dan alatan berkaitan ubatan.
2. Melaksanakan transaksi bagi pembayaran semua bil dan utiliti berkaitan;
3. Membuat pembelian tambah nilai (*top-up*) perkhidmatan telefon; dan
4. Hanya transaksi bagi pembelian rokok dan minuman beralkohol adalah dilarang bagi mengelakkan pengambilan barang yang tidak sihat menggunakan JKMPay.

Malahan baki atau lebih duit yang ada dalam akaun JKMPay juga **tidak akan luput**, dan akan dibawa ke bulan berikutnya. Bagi peserta program yang mahir menggunakan aplikasi telefon di **jkmpay.my**, pelbagai menu aplikasi secara dalam talian boleh digunakan seperti memantau perbelanjaan harian, membuat semakan baki, membayar bil dan utiliti, membeli *top-up* tanpa perlu keluar ke kedai dan melihat senarai kedai berdekatan yang boleh diakses pandu arah melalui Maps. Kementerian amat sedar mengenai keperluan asas penerima khususnya golongan OKU untuk menggunakan duit bantuan yang diperolehi setiap bulan. JKMPay tidak bertujuan untuk menyekat mana-mana hak kebebasan OKU untuk berbelanja. Apa yang diwujudkan adalah **mekanisme atau kaedah berbelanja ditambah atau diperluaskan** lagi di mana selain daripada perbelanjaan tunai, penerima boleh melaksanakan perbelanjaan secara tanpa tunai. Malahan melalui kaedah tanpa tunai ini, **tiada caj**

**tambahan atau fi transaksi dikenakan** berbanding sebagaimana caj RM1 boleh dikenakan jika mengeluarkan duit melalui mesin ATM.

Tuan Yang di-Pertua,

Sehingga **Februari 2022**, terdapat **sejumlah 397 kedai aktif** dalam projek ini manakala **250 kedai (baharu) lain** telah memohon dan berminat untuk terlibat dalam projek ini. Kementerian sedang berusaha memperbanyakkan kedai-kedai untuk memberi kemudahan kepada penerima bantuan. **Malahan penerima bantuan juga boleh mencadangkan kedai/premis bersesuaian bagi mengikuti program ini.** Cadangan ini boleh disalurkan oleh peserta melalui 4 kaedah iaitu Telegram *group* peserta, Call-Centre 1-300-88-7977, aplikasi telefon Me12Pay dan juga melalui e-mel [info@me12pay.com](mailto:info@me12pay.com).

Tuan Yang di-Pertua,

Kementerian mendapati bahawa melalui projek JKMPay ini, telah digunakan oleh penerima bantuan dengan sebaiknya bagi memenuhi keperluan asas mereka. Sehingga **Februari 2022**, **sebanyak RM4.18 juta** telah dibelanjakan oleh peserta bagi tujuan pembelian **keperluan makan/minum iaitu 80.8% atau RM3.37 juta; 16.2% atau RM678 ribu bagi pembelian keperluan rumah** seperti lampin bayi, tuala wanita, sabun pencuci dan lain-lain. **2.3% atau RM96 ribu bagi keperluan lain** seperti pembayaran bil & utiliti, *top-up* dan **0.7% atau RM29 ribu dibelanjakan bagi tujuan pembelian ubat-ubatan.** Ini menunjukkan bahawa program ini memberi impak yang baik dan manfaat kepada peserta dalam memenuhi keperluan asas mereka.

Projek ini bukan sahaja membantu penerima bantuan malahan ia dapat mewujudkan prasarana ekonomi yang baik di kalangan pekedai runcit dan kedai-kedai kecil di seluruh negara. Antara manfaat yang diperolehi adalah :

- 1) Membantu penerima bantuan mengurus dan mengawal perbelanjaan wang bantuan secara berhemah;

- 2) Menjamin peruntukan perbelanjaan keperluan makan minum dan keperluan asas penerima bantuan dan ahli isi rumah tersedia pada setiap bulan;
- 3) Kaedah perbelanjaan tanpa tunai lebih selamat berbanding perbelanjaan secara tunai dan sesuai dengan situasi semasa;
- 4) Lokasi kedai yang berdekatan dengan penerima bantuan.;
- 5) Baki bantuan tidak lupus dan boleh dibawa ke bulan seterusnya; dan
- 6) Program ini fleksibel dan boleh diubah dari masa ke semasa berdasarkan keperluan Jabatan dan penerima bantuan.

Usaha-usaha penambahbaikan juga telah mula dilaksanakan oleh Kementerian melalui pendekatan berikut:

- 1) **Sesi Libat Urus bersama Pertubuhan Sukarela Kebajikan (PSK) telah diadakan pada 24 dan 25 Februari 2022** di Dewan Perdana Nur, KPWKM bagi memberi maklumat yang lebih jelas mengenai JKMPay;
- 2) **Mempelbagaikan platform pembayaran digital** (pembelian secara dalam talian, pembayaran bil, tambah nilai kad prabayar);
- 3) **Menyediakan senarai Direktori Pekedai di setiap Daerah Rintis** dan dipaparkan di laman web, Sosial media KPWKM dan JKM serta di aplikasi ME12PAY; dan
- 4) **Menambah bilangan pekedai termasuk farmasi, klinik, kedai makan dan perkhidmatan penghantaran dari masa ke semasa.**

Memandangkan pendigitalan penyampaian perkhidmatan ini merupakan agenda masa depan negara, Kementerian akan memastikan usaha penambahbaikan projek rintis ini sentiasa dilaksanakan dari masa ke semasa. Satu kajian menyeluruh akan diadakan bagi memastikan suatu hala tuju dan dasar berkaitan projek ini dapat ditentukan. Dalam tempoh tersebut, projek ini **akan kekal berstatus projek rintis** di lokasi sedia ada dan belum diperluaskan ke negeri/daerah lain sehingga laporan kajian dinyatakan dibentangkan. Kementerian sentiasa mengalu-alukan dan membuka peluang kepada semua pihak untuk memberikan pandangan dan juga cadangan dalam menambahbaik pelaksanaan program ini.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DR. ONG KIAN MING ( BANGI )**

**TARIKH : 15 MAC 2022 (SELASA)**

**SOALAN**

Minta **MENTERI TENAGA DAN SUMBER ASLI** menyatakan sumber dan jumlah pembiayaan diskaun bil elektrik TNB dari tahun 2020 hingga hujung tahun 2021 dan menghuraikan jumlah yang ditanggung oleh dana COVID-19, KWIE, dan TNB masing-masing, termasuk jika Kementerian menanggung hutang kepada TNB dalam tahun 2020 dan 2021.

**JAWAPAN**

Tuan Yang di-Pertua,

1. Jumlah peruntukan bagi diskaun bil elektrik yang diluluskan kepada semua pengguna elektrik di seluruh negara dari tahun 2020 hingga 31 Disember 2021 adalah sebanyak RM3.70 bilion. Daripada jumlah tersebut, pecahan peruntukan yang diluluskan untuk membiayai pemberian diskaun bil elektrik adalah seperti berikut:
  - (i) **Kumpulan Wang Covid-19 sebanyak RM1.44 bilion;**
  - (ii) **Kumpulan Wang Industri Elektrik sebanyak RM1.95 bilion;**  
dan
  - (iii) **Tenaga Nasional Berhad sebanyak RM304 juta.**
2. Jumlah peruntukan yang telah dibelanjakan bagi membiayai pemberian diskaun bil elektrik sehingga 31 Disember 2021 adalah sebanyak RM3.35 bilion. Pada masa ini, Kerajaan masih melaksanakan proses pembayaran pakej-pakej diskaun tersebut secara berperingkat berdasarkan tuntutan yang dikemukakan.
3. Untuk makluman Ahli Yang Berhormat, Kerajaan tidak menanggung sebarang hutang kepada TNB dalam tahun 2020 dan 2021.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : Y.B. TUAN CHONG CHIENG JEN  
[STAMPIN]**

**TARIKH : 15 MAC 2022 (SELASA)**

**SOALAN**

**TUAN CHONG CHIENG JEN [ STAMPIN ]** minta **MENTERI KEWANGAN** menyatakan apakah sebab kelambatan pemprosesan permohonan lesen berniaga di Sarawak oleh LHDN yang mengambil berminggu-minggu untuk pengeluaran satu lesen perniagaan baru. Apakah cadangan Kerajaan untuk mempercepatkan proses ini.

**JAWAPAN**

**Tan Sri Yang di-Pertua,**

Lembaga Hasil Dalam Negeri Malaysia Cawangan Kuching hanya menjalankan fungsi Pendaftaran Nama Perniagaan dan Lesen Perdagangan bagi perniagaan di Daerah Kuching sahaja.

Unit Pendaftaran Nama Perniagaan Kuching (atau UPNP) sebelum ini melaksanakan perkhidmatan secara '*walk-in*', di mana secara purata sebanyak 250 transaksi diproses setiap hari. Transaksi ini melibatkan perkhidmatan seperti pendaftaran baru, pembaharuan lesen, ekstrak maklumat perniagaan dan penambahan aktiviti perniagaan.

Secara umumnya, waktu operasi adalah antara jam 8.00 pagi hingga 3.30 petang, di mana kaunter perlu ditutup pada jam 3.30 petang bagi tujuan pendepositan ke akaun bank, seperti termaktub dalam Arahan Perbendaharaan.

Semasa tempoh pandemik COVID-19, kehadiran orang awam untuk berurusan di kaunter UPNP Kuching di premis LHDNM Cawangan Kuching adalah terhad bagi tujuan mematuhi SOP penjarakan fizikal, seperti yang telah ditetapkan oleh Majlis Keselamatan Negara dan Jabatan Pengurusan Bencana Negeri Sarawak. Selain itu, waktu operasi di kaunter juga dihadkan kepada jam 8.00 pagi hingga 12.00 tengah hari sahaja dengan kapasiti dan bilangan pegawai kaunter yang terhad.

Dalam tempoh peralihan Fasa 3 dan Fasa 4 Pelan Pemulihan Negara pula, kehadiran pelanggan untuk berurusan di kaunter kembali kepada kaedah '*walk-in*'. Lanjutan daripada itu, jumlah permohonan pendaftaran dan pembaharuan perniagaan yang diterima semakin meningkat dan ini secara tidak langsung telah memberi kesan kepada tempoh pemprosesan. Peningkatan permohonan ini adalah disebabkan ramai yang ingin mendaftar serta memperbaharui lesen perniagaan bagi tujuan memperolehi bantuan inisiatif kerajaan dengan penyediaan pelbagai bantuan, seperti Geran Khas Prihatin (atau GKP), Geran Khas Prihatin Tambahan di bawah pakej PERMAI dan GKP PEMERKASA+,

disusuli dengan insentif Bantuan Khas Sarawakku Sayang daripada Kerajaan Negeri Sarawak.

Kerajaan melalui LHDNM mengambil inisiatif untuk mengatasi masalah kelewatan dalam memproses permohonan tersebut dengan membangunkan sistem e-Daftar Niaga yang dijadualkan akan dapat diakses oleh pemohon mulai Mac 2022. Sistem e-Daftar Niaga ini boleh dicapai melalui laman web <https://spnp.hasil.gov.my>.

Walau bagaimanapun, setakat ini proses bayaran masih perlu dilakukan secara manual di kaunter memandangkan sistem untuk bayaran secara *online* masih sedang dibangunkan. Sehubungan itu, dengan penyediaan sistem e-Daftar Niaga ini, masalah kelewatan proses permohonan lesen perniagaan dapat dikurangkan dengan ketara.

Sekian, terima kasih.

**PEMBERITAHUAN PERTANYAAN JAWAB LISAN DEWAN  
RAKYAT MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : TUAN CHOW KON YEOW  
[TANJONG]**

**TARIKH : 15 MAC 2022 (SELASA)**

**SOALAN**

**TUAN CHOW KON YEOW [TANJONG]** minta **MENTERI PENGAJIAN TINGGI** menyatakan statistik graduan institusi pengajian tinggi awam serta swasta dan lepasan Pendidikan dan Latihan Teknikal dan Vokasional (TVET) bagi tempoh lima tahun terkini mengikut pecahan negeri serta bidang pengajian masing-masing. Perincian juga unjuran graduan institusi-institusi berkaitan untuk tempoh lima tahun akan datang mengikut pecahan sebagaimana di atas.

**JAWAPAN**

**Tan Sri Yang di-Pertua,**

Berdasarkan Sistem Kajian Pengesanan Graduan (SKPG) yang dikeluarkan oleh Kementerian Pengajian Tinggi (KPT), jumlah keluaran graduan bagi tahun 2020 secara keseluruhan yang merangkumi graduan Institusi Pendidikan Tinggi (IPT) termasuk Politeknik, Kolej Komuniti dan Institusi Latihan Kemahiran Awam (ILKA) adalah seramai **318,593 orang graduan**. Daripada jumlah tersebut, seramai **127,334 orang graduan Universiti Awam (UA) (40%)** dan **110,797 orang graduan Institusi Pendidikan Tinggi Swasta (IPTS) (34.8%)** dikeluarkan pada tahun 2020.

Data menunjukkan **dua (2) kelompok terbesar keluaran graduan tahun 2020 bagi Universiti Awam (UA) dan Institusi Pendidikan Tinggi Swasta (IPTS) adalah graduan dalam bidang sains sosial, perniagaan dan perundangan** dengan masing-masing menyumbang kepada 33.5% keluaran graduan bagi UA dan 44.4% keluaran graduan bagi IPTS, **diikuti oleh graduan bidang kejuruteraan, pembuatan dan pembinaan** dengan masing-masing menyumbang kepada 23.4% keluaran graduan bagi UA dan 14.2% keluaran graduan bagi IPTS.

Dalam perkara yang berkaitan, **jumlah graduan Politeknik bagi program sepenuh masa bagi tempoh lima (5) tahun (2016 hingga 2020)** adalah seperti berikut:

i) **Tahun 2016, 2017, 2019 dan 2020:**

37,535 graduan pada tahun 2016, 38,300 graduan pada tahun 2017, 40,730 graduan pada tahun 2019 dan 37,450 graduan pada tahun 2020 dengan **negeri Perak menyumbang kepada peratusan graduan tertinggi** bagi keempat-empat tahun tersebut; dan

ii) **Tahun 2018:**

38,595 graduan dengan **negeri Selangor menyumbang kepada peratusan graduan tertinggi** iaitu seramai 3,965 graduan (10.27%).

Manakala **jumlah graduan Kolej Komuniti bagi program sepenuh masa bagi tempoh lima (5) tahun (2016 hingga 2020)** adalah seperti berikut:

i) **Tahun 2016, 2017, 2019 dan 2020:**

20,635 graduan pada tahun 2016, 22,893 graduan pada tahun 2017, 16,948 graduan pada tahun 2019 dan 15,861 graduan pada tahun 2020 dengan **negeri Johor menyumbang kepada peratusan graduan tertinggi** bagi keempat-empat tahun tersebut; dan

ii) **Tahun 2018:**

21,519 graduan dengan **negeri Perak menyumbang kepada peratusan graduan tertinggi** iaitu seramai 3,170 graduan (14.73%).

Selaras dengan perkara ini, di peringkat Politeknik dan Kolej Komuniti, KPT menyasarkan unjuran kemasukan pelajar bagi tempoh lima (5) tahun akan datang mengikut negeri adalah melebihi 30 ribu pelajar di Politeknik dan purata 20 ribu pelajar untuk Kolej Komuniti.

Dalam hal ini, penawaran bidang TVET adalah dijangkakan tertumpu dalam bidang teknologi maklumat, kejuruteraan, sajian dan katering serta pelbagai bidang TVET lain yang diperlukan oleh industri. Antara pertimbangan dalam pembangunan program dan kurikulum tersebut adalah dengan merujuk kepada laporan berkaitan dengan keperluan industri serta guna tenaga negara/ serantau/ global dalam membangunkan kurikulum dengan mengambilkira permintaan tinggi pada masa depan sejajar dengan ledakan Revolusi Industri 4.0 (4IR).

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : TUAN KESAVAN A/L SUBRAMANIAM  
[ SUNGAI SIPUT ]**

**TARIKH : 15 MAC 2022 (SELASA)**

**SOALAN**

**TUAN KESAVAN A/L SUBRAMANIAM [ SUNGAI SIPUT ]** minta **MENTERI PELANCONGAN, SENI DAN BUDAYA** menyatakan produk-produk pelancongan yang berpotensi untuk dibangunkan atau dinaik taraf di Parlimen Sungai Siput.

**JAWAPAN**

**Tuan Yang di-Pertua,**

1. Kawasan Sungai Siput dan sekitarnya mempunyai pelbagai produk yang berpotensi dibangunkan bagi sektor eko-pelancongan. Antara produk pelancongan yang boleh dibangunkan atau dinaik taraf di Sungai Siput adalah Jambatan Victoria, Pos Kuala Mu, Lata Penyel, Bukit Berekeh, Gua Kelawar atau Gua Fossil, Bukit Singa, Ladang Infoternak Sungai Siput, Pusat Kraftangan Enggor dan Pusat Penternakan Ikan Hiasan Enggor.

2. Kementerian Pelancongan, Seni dan Budaya (MOTAC) melalui agensinya Tourism Malaysia juga sentiasa komited dalam mempromosikan produk-produk pelancongan di Parlimen Sungai Siput dan kawasan produk pelancongan yang terdapat di sekitarnya yang berpotensi mengikut segmen seperti:

- (i) produk-produk yang berasaskan *Nature*, *Eco* dan *Adventure* seperti aktiviti mendaki di Bukit Berekeh dan pelbagai aktiviti yang berkaitan dengan mengambil peluang kekayaan dan keindahan alam semulajadi Sungai Siput;
- (ii) produk pelancongan '*Religious Tourism*' membabitkan Kuil Sri Subramaniam Thevasthanam Paripalana Temple Sabah yang terdapat di Parlimen Sungai Siput yang mengadakan sambutan Thaipusam setiap tahun yang boleh dikomersikan seperti kuil-kuil lain yang terdapat di Malaysia; dan
- (iii) mengetengahkan produk pelancongan Kuala Mu di Parlimen Sungai Siput dalam kempen '*Dream Malaysia*' dengan kerjasama GoPro.

3. Selain itu, MOTAC telah mewujudkan insentif-insentif bagi membangunkan atau menaik taraf produk-produk pelancongan yang boleh dimanfaatkan oleh penggiat industri di Sungai Siput. Insentif yang ditawarkan tersebut adalah Skim Infrastruktur Pelancongan (SIP) dan Pendaftaran Projek Pelancongan.



## SOALAN NO : 25

4. SIP diuruskan oleh Bank Pembangunan Malaysia Berhad (BPMB) yang menawarkan skop pembiayaan seperti berikut:

- (i) Pembelian tanah, pembinaan bangunan, mesin dan pelbagai aset yang berkaitan dengan pelancongan;
- (ii) Modal kerja bagi syarikat yang terlibat dalam industri pelancongan; dan
- (iii) Kerja-karya pengubahsuaian dan naik taraf yang berkaitan dengan industri pelancongan.

5. Seterusnya, penggiat industri pelancongan juga boleh memohon insentif berbentuk pengecualian cukai sebagai usaha Kerajaan mengiktiraf pelabur-pelabur dan pengusaha-pengusaha yang melabur dalam sektor pelancongan. Insentif ini diberikan kepada pengusaha projek penginapan dan projek bukan penginapan melalui pemberian Sijil Pendaftaran Projek Pelancongan oleh MOTAC yang membolehkan pengusaha projek pelancongan mendapatkan insentif pengecualian cukai daripada *Malaysian Investment Development Authority* (MIDA).

6. MOTAC juga sentiasa bersedia untuk mempertimbangkan sebarang permohonan baharu bagi membantu menaik taraf prasarana pelancongan di Perak secara amnya, termasuklah di kawasan Parlimen Sungai Siput sekiranya terdapat permohonan rasmi daripada Perbadanan Kemajuan Negeri Perak atau Kerajaan Negeri Perak demi menyokong industri pelancongan tempatan sekaligus menjana ekonomi setempat dengan syarat, aspek penyelenggaraan diberi perhatian yang sewajarnya selepas kerja-kerja baik pulih selesai.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : TUAN AHMAD JOHNIE BIN ZAWAWI [ IGAN ]**

**TARIKH : 15 MAC 2022 (SELASA)**

**SOALAN**

**TUAN AHMAD JOHNIE BIN ZAWAWI [ IGAN ]** minta **MENTERI KANAN PENDIDIKAN** menyatakan tentang isu capaian internet yang dihadapi oleh pelajar di kawasan pedalaman Sarawak. Apakah perkembangan terkini tindakan yang diambil dan peruntukan yang terlibat bagi memastikan anak-anak luar bandar tidak tercicir. Berapa jumlah peruntukan yang di sediakan untuk Sarawak sahaja dan nyatakan sekolah-sekolah yang terlibat.

**JAWAPAN**

**Tuan Yang di-Pertua,**

Kementerian Pendidikan Malaysia (KPM) telah menyediakan capaian internet untuk 1,457 sekolah di Sarawak melibatkan peruntukan sebanyak RM7 juta setahun. Ini termasuk 328 sekolah pedalaman Sarawak yang disediakan capaian internet menggunakan teknologi talian jalur lebar tanpa wayar dan talian satelit *Very Small Aperture Terminal* (VSAT).

Untuk makluman, KPM dalam tindakan untuk menambah baik perkhidmatan internet bagi 200 sekolah termasuk 132 sekolah di kawasan pedalaman dan 68 sekolah di kawasan luar bandar menerusi teknologi talian jalur lebar tanpa wayar, talian fiber atau teknologi VSAT.

KPM turut bekerjasama dengan Unit Pemodenan Tadbiran dan Perancangan Pengurusan Malaysia (MAMPU) bagi mengenal pasti pendekatan terbaik untuk memastikan capaian internet di sekolah KPM terus dipertingkatkan. Ini termasuklah penyediaan rangkaian bersepadu KPM yang berlandaskan tiga (3) prinsip utama iaitu bersesuaian dengan tujuan (*fit for purpose*), kekal relevan pada masa hadapan (*future proof*) dan penyelesaian yang holistik (*holistic solution*).

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : Y.B. TUAN LIM GUAN ENG  
[BAGAN]**

**TARIKH : 15 MAC 2022 (SELASA)**

**SOALAN**

**TUAN LIM GUAN ENG [ BAGAN ]** minta **MENTERI KEWANGAN** menyatakan sama ada moratorium pinjaman bank dan pengecualian faedah akan dilanjutkan untuk tempoh enam bulan lagi termasuk juga kepada SMEs yang menghadapi kekangan kewangan akibat kemelesetan kewangan COVID-19 serta bencana banjir. Nyatakan kosnya kepada sektor kewangan.

**JAWAPAN**

**Tan Sri Yang di-Pertua,**

Untuk makluman, walaupun kegiatan ekonomi telah dibuka semula secara beransur-ansur mulai Ogos 2021, masih terdapat segelintir peminjam yang memerlukan tempoh masa yang lebih lama untuk memulihkan semula kedudukan kewangan mereka. Oleh itu, Agensi Kaunseling dan Pengurusan Kredit (atau AKPK) dan industri perbankan telah memperkenalkan Program Pengurusan dan Ketahanan Kewangan (atau URUS), khusus untuk peminjam dari golongan kumpulan pendapatan 50 peratus terbawah (atau B50 dengan isi rumah berpendapatan sehingga 5,880 ringgit sebulan) yang mungkin memerlukan bantuan selanjutnya selepas bantuan bayaran balik di bawah program PEMULIH berakhir.

Program URUS ini juga boleh dimanfaatkan oleh pihak yang terjejas akibat banjir pada akhir Disember yang lalu yang memenuhi syarat kelayakan URUS. Bagi golongan ini, AKPK akan menyelaraskan dengan bank-bank terlibat bagi memastikan peralihan lancar kepada program URUS setelah bantuan akibat banjir mereka tamat.

Di bawah program URUS, peminjam golongan B50 yang memenuhi syarat akan mendapat pengecualian faedah selama tiga bulan dan pengurangan ansuran pinjaman sehingga 24 bulan, termasuk nasihat pengurusan kewangan yang boleh meningkatkan daya tahan kewangan peminjam untuk jangka masa panjang.

Manakala, peminjam individu yang tidak layak untuk URUS serta perusahaan kecil dan sederhana (atau PKS), yang memerlukan bantuan bayaran balik pinjaman, boleh menghubungi bank masing-masing untuk menyusun semula bayaran balik pinjaman yang bersesuaian dengan keadaan kewangan mereka. Peminjam juga boleh memohon pelbagai program yang ditawarkan oleh AKPK seperti Program Pengurusan Hutang (atau *Debt Management Programme*, DMP), Skim Penyelesaian Pinjaman Kecil (atau *Small Debt Resolution Scheme*, SDRS) dan Skim Sokongan Daya Tahan Kewangan (atau *Financial Resilience Support*

*Scheme*, FIRST). Program-program ini dilaksanakan dengan kerjasama dan sokongan bank-bank, dan mempunyai ciri-ciri seperti pengurangan ansuran bulanan, pelanjutan tempoh bayaran balik dan program sokongan daya tahan kewangan.

Kerajaan menerusi institusi perbankan komited untuk membantu peminjam yang masih mengalami kekangan kewangan akibat pandemik COVID-19. Oleh itu, individu dan PKS yang memerlukan bantuan disarankan menghubungi bank masing-masing untuk membincangkan jenis bantuan yang sesuai dengan situasi kewangan mereka. Peminjam juga mempunyai alternatif untuk berhubung terus dengan AKPK untuk mendapat khidmat nasihat percuma dan mendaftar dalam mana-mana program bantuan bayaran balik pinjaman yang disediakan oleh AKPK.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : Y.B. DATUK ZAKARIA BIN MOHD  
EDRIS@TUBAU  
[LIBARAN]**

**TARIKH : 15 MAC 2022 (SELASA)**

**SOALAN**

**DATUK ZAKARIA BIN MOHD EDRIS@TUBAU [ LIBARAN ]** minta  
**MENTERI KEWANGAN** menyatakan:

(a) adakah kemunculan varian baharu COVID-19, Omicron pada peringkat global berpotensi menggugat pemulihan ekonomi negara pada skala besar dan luar kawalan; dan

(b) apakah langkah yang diambil Kerajaan untuk mengekalkan momentum pelaburan negara supaya mengurangkan kesan Omicron.

**JAWAPAN**

**Tan Sri Yang di-Pertua,**

Ancaman varian Omicron di peringkat global dijangka berterusan dan kekal menjadi risiko kepada prospek pemulihan ekonomi Malaysia ke arah mencapai tahap seperti sebelum pandemik COVID-19. Namun begitu, kesan negatif varian baharu ini ke atas ekonomi negara dijangka tidak seteruk seperti yang dialami pada tahun 2020. Walaupun Bank Dunia dan Tabung Kewangan Antarabangsa (IMF) telah menyemak semula unjuran pertumbuhan global tahun 2022 kepada kadar yang lebih perlahan iaitu 4.1% (Bank Dunia) dan 4.4% (IMF), unjuran terkini pertumbuhan ekonomi Malaysia tahun 2022 oleh kedua-dua badan dunia tersebut adalah masih dalam lingkungan unjuran Kerajaan iaitu di antara 5.5% hingga 6.5% (Bank Dunia: 5.8%; IMF: 5.7%).

Kerajaan terus komited untuk melindungi rakyat dan memastikan kesinambungan pemulihan sosio-ekonomi negara melalui pelaksanaan dasar-dasar yang bertujuan untuk merancakkan aktiviti ekonomi dan sosial. Jangkaan pertumbuhan ekonomi yang lebih baik pada 2022 (pertumbuhan ekonomi 2021: 3.1%) akan didorong terutamanya oleh pelaksanaan langkah di bawah Bajet 2022 yang masih bersifat mengembang (*expansionary*), normalisasi dalam aktiviti ekonomi dan sosial selaras dengan kadar vaksinasi yang tinggi, penyambungan semula projek infrastruktur dengan kesan pengganda yang tinggi serta permintaan luar yang kukuh, terutamanya daripada rakan dagangan utama.

Dari sudut langkah kawalan kesihatan pula, Kerajaan tidak akan melaksanakan lagi Perintah Kawalan Pergerakan (PKP), namun tindakan memperkukuh kawalan di pintu masuk antarabangsa serta saringan ke atas golongan yang berisiko tinggi akan dilaksanakan bagi mengawal pandemik ini. Di samping itu, langkah suntikan dos penggalak vaksin akan diperluas untuk memastikan tahap perlindungan yang optimum kepada rakyat bagi mengelakkan risiko jangkitan COVID-19.



Berkenaan dengan soalan yang kedua pula, pandemik COVID-19 yang melanda dunia sejak tempoh tiga (3) tahun ini telah mengubah landskap pelaburan dunia, termasuk Malaysia. Sungguh pun begitu, Malaysia masih kekal utuh sebagai destinasi pelaburan utama bagi para pelabur di rantau ini. Hal ini terbukti apabila jumlah pelaburan yang diluluskan dalam sektor perkilangan, perkhidmatan dan utama bagi tempoh Januari sehingga September 2021 meningkat sebanyak 51.5 peratus, iaitu dengan nilai sebanyak RM177.8 bilion, berbanding tempoh yang sama pada tahun lalu (RM117.4 bilion). Daripada jumlah pelaburan yang diluluskan itu, pelaburan langsung asing (FDI) menyumbang sebanyak RM71.71 bilion.

Kerajaan juga telah mengambil pelbagai langkah dalam usaha mengekalkan momentum pelaburan negara serta mengurangkan kesan pandemik COVID-19, antara lain termasuk:

- Mengumumkan Pakej Perlindungan Rakyat dan Pemulihan Ekonomi (PEMULIH) yang bernilai RM150 bilion bertujuan memberi potongan cukai ke atas perbelanjaan yang meliputi pembiayaan peralatan dan perkhidmatan penyediaan pusat vaksinasi oleh majikan; dan
- Menggalakkan syarikat-syarikat sedia ada untuk menjalankan pelaburan semula dengan memperkenalkan *Special Reinvestment Allowance* (RA) bagi sektor perkilangan (berkuat kuasa dari penilaian daripada tahun 2020 hingga 2022).

Selain itu, Kerajaan melalui Kementerian Perdagangan Antarabangsa dan Industri (MITI) dan Lembaga Pembangunan Pelaburan Malaysia (MIDA) sedang giat melaksanakan usaha-usaha strategik seperti berikut:

- memperkenalkan Dasar Pelaburan Baharu Negara Berteraskan Aspirasi Pelaburan Negara (*National Investment Aspirations* - NIA) yang merupakan pendekatan berfokus dan bersasar dalam merencanakan agenda pelaburan nasional Negara secara holistik dan inklusif untuk kesejahteraan rakyat dan pertumbuhan ekonomi negara;

- mengoptimumkan *Project Acceleration and Coordination Unit* (PACU) di MIDA dalam penyediaan fasilitasi yang menyeluruh kepada projek yang telah diluluskan bagi mempercepatkan pelaksanaan projek pelaburan berkaitan di negara ini. Malah pada April 2021, MIDA telah melancarkan permohonan dalam talian berstruktur baharu melalui portal InvestMalaysia. Ini adalah inisiatif MIDA bagi memudahkan permohonan pelabur untuk mempercepat kelulusan yang diperlukan termasuk permohonan lesen pengilang, insentif dan pengecualian cukai, dengan memanfaatkan penggunaan teknologi digital.
- menubuhkan *Digital Investment Office* (DIO) iaitu platform usahasama digital antara MIDA dan *Malaysia Digital Economy Corporation* (MDEC) untuk menyelaraskan dan memudahkan cara kesemua pelaburan digital. Malaysia mensasarkan penarikan pelaburan digital sebanyak RM70 bilion menjelang tahun 2025;
- menggerakkan sepenuhnya Pusat Sehenti (*One Stop Centre* - OSC) yang dikendalikan oleh MIDA bersama-sama wakil dari Jabatan Imigresen, Kementerian Kesihatan dan MITI untuk menilai permohonan pelawat perniagaan yang layak untuk memasuki Malaysia bagi tujuan perdagangan dan pelaburan. Pelawat perniagaan ini termasuk ahli perniagaan dan pakar teknikal yang menyediakan khidmat nasihat teknikal dan pemasangan mesin dan peralatan. Sehingga 30 November 2021, OSC telah membantu 1,391 buah syarikat dengan nilai pelaburan sebanyak RM132.92 bilion;
- menandatangani perjanjian persefahaman (MoU) dengan pelbagai pihak berkepentingan seperti dewan perniagaan antarabangsa, institusi kewangan, agensi promosi pelaburan, syarikat multinasional dan pemaju tanah untuk menarik pelaburan berkualiti ke negara ini;
- mempergiatkan misi-misi perdagangan dan pelaburan ke Jepun, Republik Korea, Arab Saudi, Emiriah Arab Bersatu (UAE), Qatar, Republik Austria, Republik Turki, Jerman, Perancis dan United Kingdom pada tahun 2021. Malaysia telah berjaya mendapatkan komitmen pelaburan sebanyak RM50 bilion dan berpotensi mewujudkan 30,383 peluang pekerjaan; dan

- menjalankan *media blitz* bagi mempromosikan Malaysia melalui media antarabangsa termasuk *Bloomberg* dan *The Economist*.

Pada dasarnya, Kerajaan sentiasa komited dalam menghadapi persekitaran pasca pandemik Covid-19. Kerajaan optimis untuk menarik pelaburan daripada syarikat-syarikat asing berprofil tinggi seperti yang tersenarai dalam *Fortune Global 500* dan *Global Unicorns* dalam memastikan pelaburan asing yang masuk ke dalam negara adalah pelaburan berkualiti dan berimpak tinggi.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : YEO BEE YIN ( BAKRI )**

**TARIKH : 15 MAC 2022 (SELASA)**

**SOALAN**

Minta **MENTERI TENAGA DAN SUMBER ASLI** menyatakan status terkini projek Laos-Thailand-Malaysia-Singapura (LTMS) di bawah ASEAN Power Grid (APG).

**JAWAPAN**

Tuan Yang di-Pertua,

Keempat-empat negara yang terlibat iaitu Lao PDR, Thailand, Malaysia dan Singapura sedang dalam peringkat akhir untuk memuktamadkan perjanjian bagi pelaksanaan *Laos-Thailand-Malaysia-Singapore Power Integration Project* (LTMS-PIP). Projek ini melibatkan penyaluran elektrik sehingga 100 MW dari Lao PDR ke Singapura melalui Thailand dan Malaysia menggunakan rangkaian grid voltan tinggi sedia ada dan akan dilaksanakan untuk tempoh dua tahun.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DATO' SRI AZALINA OTHMAN SAID  
[ Pengerang ]**

**TARIKH : 15 MAC 2022 (SELASA)**

**SOALAN**

**DATO' SRI AZALINA OTHMAN SAID [ Pengerang ]** minta **MENTERI  
PELANCONGAN, SENI DAN BUDAYA** menyatakan

- (a) status terkini garis panduan Penginapan Kediaman Jangka Pendek ataupun 'Short Term Residential Accommodation (STRA) dan jangka masa pelaksanaannya; dan
- (b) peraturan/undang-undang sedia ada berkenaan dengan STRA.

**JAWAPAN:**

**Tuan Yang di-Pertua,**

1. Untuk makluman Ahli Yang Berhormat, penyediaan garis panduan Penginapan Kediaman Jangka Pendek ataupun *Short Term Residential Accommodation* (STRA) telah diterajui oleh Kementerian Perdagangan Antarabangsa dan Industri (MITI) menerusi agensinya, *Malaysia Productivity Corporation* (MPC). Kementerian Pelancongan, Seni dan Budaya (MOTAC) telah memberikan input dan maklum balas relevan yang diperlukan bagi penyediaan garis panduan tersebut. MOTAC masih menunggu maklum balas selanjutnya mengenai hala tuju pembangunan dokumen tersebut.
2. Berdasarkan Jadual Kesembilan Perlembagaan Persekutuan, perkara berkaitan *boarding houses or lodging houses* (rumah tumpangan atau rumah pemalaman) adalah di bawah bidang kuasa kerajaan negeri yang berciri tempatan. Sehubungan itu, pelesenan dan pengawalseliaan premis penginapan jangka pendek adalah di bawah bidang kuasa Pihak Berkuasa Tempatan (PBT).
3. Untuk makluman Ahli Yang Berhormat, pada masa ini, menerusi Akta Industri Pelancongan (AIP) 1992, MOTAC boleh melesenkan syarikat OTA (*online travel agency*) berdasarkan Garis Panduan Permohonan Lesen TOBTAB sedia ada tanpa merujuk kepada Garis Panduan STRA.
4. Walau bagaimanapun, AIP 1992 tiada kuasa untuk mengawal selia aktiviti STRA yang lain seperti pelesenan hos/ejen, lesen operasi perniagaan hotel, perubahan status tanah dan sebagainya yang merupakan bidang kuasa Kementerian Perumahan dan Kerajaan Tempatan (KPKT) dan PBT di mana “rumah tumpangan dan rumah pemalaman” adalah di bawah Senarai Negeri (Senarai II).

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DATUK DR. SHAHRUDDIN BIN MD.  
SALLEH [SRI GADING]**

**TARIKH : 15 MAC 2022 (SELASA)**

**SOALAN NO. 18**

**DATUK DR. SHAHRUDDIN BIN MD. SALLEH [SRI GADING]** minta **MENTERI PERTANIAN DAN INDUSTRI MAKANAN** menyatakan apakah usaha Kementerian dalam menggalakkan petani dan pekebun kecil menggunakan model pertanian pintar bagi meningkatkan pengeluaran sayur-sayuran negara.

**JAWAPAN**

**Tuan Yang di-Pertua,**

Untuk makluman Ahli Yang Berhormat, Kementerian Pertanian dan Industri Makanan (MAFI) telah menjalankan beberapa inisiatif dalam menggalakkan petani dan pekebun kecil menggunakan model pertanian pintar bagi meningkatkan pengeluaran sayur-sayuran negara. Antara inisiatif yang dilaksanakan oleh MAFI adalah seperti berikut:

**i. Program Ladang e-Satelit**

Lembaga Pertubuhan Peladang (LPP) sedang melaksanakan Program Ladang e-Satelit yang berbentuk geran padanan dengan nisbah 70 peratus oleh Kerajaan dan 30 peratus oleh peserta dengan had maksimum RM30,000 bagi setiap permohonan. Ia bertujuan untuk mewujudkan projek agromakanan berdaya maju menggunakan model pertanian pintar seperti sistem *Internet of Things* (IoT) bagi meningkatkan produktiviti. Sebanyak RM10 juta telah diperuntukkan kepada 394 peserta termasuk 79 peserta yang terlibat dalam tanaman sayur-sayuran.

**ii. Menyediakan Ladang Contoh Untuk Petani Dan Pekebun Kecil**

MARDI Alor Setar telah dibangunkan sebagai ladang contoh fertigasi lengkap dengan sistem IoT pada pertengahan tahun 2021. Peserta boleh menggunakan fasiliti ini selama setahun, kemudian mengaplikasikan teknologi yang sama di ladang sendiri bagi meningkatkan hasil pengeluaran tanaman kontan. Seramai 60 peserta telah menjalani *hands-on training* berkaitan sistem fertigasi dan IoT di ladang ini pada tahun 2021.

**iii. Penganjuran Kursus Dan Latihan Teknologi Pertanian Pintar**

Kilang tanaman merupakan salah satu model pertanian pintar yang boleh diperkenalkan kepada petani dan pekebun kecil,



## **SOALAN NO : 31**

bergantung kepada skala yang bersesuaian dengan tanaman yang diusahakan. Oleh itu, MARDI telah menganjurkan lebih daripada 10 siri latihan berkaitan kilang tanaman bermula tahun 2019 sehingga kini, melibatkan lebih daripada 100 peserta.

Selain itu, jabatan dan agensi di bawah MAFI turut bekerjasama dengan pihak industri dalam memperkenalkan penggunaan teknologi. Sebagai contoh, Jabatan Pertanian telah bekerjasama dengan syarikat penyedia teknologi pertanian pintar di beberapa Taman Kekal Pengeluaran Makanan (TKPM) seperti TKPM Lebu, Pahang, TKPM Serdang, Selangor dan TKPM Ayer Hitam, Johor bagi membolehkan petani melihat sendiri keberkesanan penggunaan model pertanian pintar.

Dalam hubungan ini, MAFI dan jabatan serta agensinya akan terus komited dalam memberi sokongan dan khidmat nasihat teknikal kepada petani dan pekebun kecil yang berminat untuk beralih kepada penggunaan teknologi moden.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DATO' MOHD NIZAR BIN HAJI ZAKARIA  
( PARIT )**

**TARIKH : 15 MAC 2022 (SELASA)**

**SOALAN**

Minta **MENTERI TENAGA DAN SUMBER ASLI** menyatakan:

- a) berapa jumlah kes pembalakan haram yang dilaporkan sepanjang tahun 2020 sehingga akhir tahun 2021; dan
- b) sejauh manakah aktiviti pembalakan yang berlaku telah mengganggu ekosistem hidupan liar seperti harimau.

**JAWAPAN (a)**

Tuan Yang di-Pertua,

1. Sebanyak 56 kes pembalakan haram pada tahun 2020 dan 55 kes pembalakan haram pada tahun 2021 telah diambil tindakan di Semenanjung. Manakala, sebanyak 35 kes pembalakan haram dan 131 kes kesalahan hutan lain telah diambil tindakan di Sabah. Di Sarawak pula sebanyak 129 kes pembalakan haram dan 56 kes kesalahan hutan lain telah diambil tindakan. Penjenayah yang melakukan kesalahan tersebut telah diambil tindakan di bawah Akta Perhutanan Negara 1984 [Akta 313] di Semenanjung Malaysia, Ordinan Hutan 2015 (Bab 71) di Sarawak dan Enakmen Hutan 1968 (*Sabah No. 2 of 1968*) di Sabah.

**JAWAPAN (b)**

2. Untuk makluman Ahli Yang Berhormat, peralihan negara untuk menjadi sebuah negara maju dan berpendapatan tinggi telah mendatangkan pelbagai tekanan ke atas dirian hutan seperti perubahan guna tanah, fragmentasi dan kehilangan kawasan berhutan serta habitat hidupan liar. Sebarang aktiviti penukaran guna tanah dan pembangunan kawasan berhutan yang tidak dilaksanakan mengikut amalan Pengurusan Hutan Secara Berkekalan (*Sustainable Forest Management – SFM*) akan memberikan kesan kepada ekosistem hidupan liar.

3. Dalam hal ini, Kementerian Tenaga dan Sumber Asli (KeTSA) melalui JPSPM dan Kerajaan-kerajaan Negeri melalui Jabatan Perhutanan Negeri komited dalam melaksanakan pengusaha hasil hutan mengikut amalan SFM yang memberikan penekanan kepada keseimbangan aspek

pemeliharaan serta pemuliharaan hutan dan fungsinya dalam pembangunan sosioekonomi.

4. Pelaksanaan SFM sejak tahun 1901 di Malaysia adalah berpandukan kepada Dasar Perhutanan Malaysia serta selaras dengan komitmen negara terhadap ketetapan di bawah Forum Hutan Pertubuhan Bangsa-bangsa Bersatu (*United Nations Forum on Forests* - UNFF). Selain itu, bagi memelihara dan memulihara kawasan hutan-hutan simpan yang turut menjadi habitat hidupan liar di negara ini, beberapa langkah dan inisiatif untuk memastikan aktiviti pembalakan tidak mengganggu ekosistem hidupan liar telah diambil seperti berikut:

- (i) hanya pokok yang matang dan ditanda untuk ditebang sahaja yang boleh diusaha hasil. Sementara itu, pokok-pokok yang mempunyai nilai perlindungan seperti pokok ibu, pokok buah-buahan untuk kepentingan hidupan liar dan spesies-spesies pokok yang dikategorikan sebagai Sangat Terancam, Terancam dan Jarang Ditemui (*Endangered, Rare and Threatened -ERT*) tidak dibenarkan ditebang;
- (ii) kawasan Hutan Simpanan Kekal (HSK) yang dikelaskan sebagai Hutan Perlindungan tidak dibenarkan untuk diusaha hasil; dan
- (iii) kawasan-kawasan yang mempunyai nilai perlindungan seperti kawasan tadahan air, kawasan zon penampungan sungai, kawasan yang berkecerunan 40 darjah, jenut hidupan liar (*salt-licks*) dan kawasan sensitif alam sekitar yang terdapat di dalam kawasan lesen tidak dibenarkan diusaha hasil;

- (iv) melaksanakan inisiatif *Central Forest Spine* (CFS) bagi membentuk tulang belakang rangkaian Kawasan Sensitif Alam Sekitar (KSAS) dan mengekalkan kawasan berhutan untuk pemeliharaan dan pemuliharaan kepelbagaian biologi. CFS melibatkan kawasan seluas kira-kira 6.71 juta hektar di mana 71 peratus daripadanya melibatkan HSK. Manakala selebihnya merupakan hutan Tanah Kerajaan dan Tanah Bermilik;
- (v) membina lintasan hidupan liar (*viaduct*) di Sungai Deka, Terengganu, Sungai Yu di Pahang dan Gerik di Perak bagi mengelak dan mengurangkan kadar kemalangan jalan raya yang membabitkan hidupan liar;
- (vi) KeTSA melalui JPSM dan Jabatan Perlindungan Hidupan Liar dan Taman Negara Semenanjung Malaysia (PERHILITAN) juga telah merancang untuk membina koridor ekologi di Mersing Johor yang akan melibatkan pembinaan jejambat dan lintasan hidupan liar; dan
- (vii) mewujudkan Santuari Gajah Johor (*Johor Elephant Sanctuary* –JES) bagi mengurangkan ancaman konflik gajah dan manusia. JES telah mula beroperasi pada hujung tahun 2020 dan gajah-gajah dari kawasan konflik akan mula dipindahkan di JES pada pertengahan tahun 2022.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : Y.B. PUAN MARIA CHIN BINTI  
ABDULLAH  
[PETALING JAYA]**

**TARIKH : 15 MAC 2022 (SELASA)**

**SOALAN**

**PUAN MARIA CHIN BINTI ABDULLAH [ PETALING JAYA ]** minta **MENTERI KEWANGAN** menyatakan adakah peruntukan bantuan Keluarga Malaysia bagi mangsa banjir pada tahun lalu datang dari peruntukan Bajet 2021 atau Bajet 2022.

**JAWAPAN**

**Tan Sri Yang di-Pertua,**

Untuk makluman Yang Berhormat, di bawah pakej Bantuan Banjir Keluarga Malaysia, setiap mangsa banjir yang layak akan sekurang-kurangnya menerima bantuan tunai langsung sehingga RM10,000. Malah, bagi yang dikenal pasti mendapat kemudahan pembinaan rumah baharu, nilai bantuan yang diterima adalah sehingga RM61,000.

Bantuan tunai langsung RM10,000 ini merangkumi antaranya:

- Bantuan Wang Ihsan sebanyak RM1,000;
- Bantuan Tunai Barangan Keperluan Asas sebanyak RM2,500;
- Rebat pembelian peralatan elektrik bernilai RM500;
- Bantuan pembaikan kenderaan RM1,000; dan
- Pembaikan Kecil Rumah sehingga RM5,000.

Selain bantuan tunai secara langsung, Kerajaan turut menyediakan kemudahan pembiayaan kepada setiap Ketua Isi Rumah (KIR) melalui pinjaman BSN sehingga RM10,000 pada kadar faedah 0 peratus, termasuk moratorium bayaran balik selama enam bulan.

Implikasi kewangan dijangka melebihi RM2 bilion di mana sebanyak RM480 juta ditampung menggunakan peruntukan tahun 2021 dan akan di bawa sebagai Rang Undang-Undang Perbekalan Tambahan 2021 dalam sesi Parlimen kali ini manakala selebihnya ditampung menggunakan peruntukan tahun 2022 melalui penyesuaian semula Bajet 2022. Kementerian Kewangan juga akan meneliti keperluan tersebut dari semasa ke semasa dan akan sentiasa memberi keutamaan penuh bagi membantu mangsa-mangsa banjir yang terjejas.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DATO' DR. XAVIER JAYAKUMAR A/L  
ARULANANDAM (KUALA LANGAT)**

**TARIKH : 15 MAC 2022 (SELASA)**

**SOALAN**

Minta **MENTERI TENAGA DAN SUMBER ASLI** menyatakan langkah-langkah yang diambil oleh Kementerian dalam usaha pengawalan pengeluaran REE (Unsur Nadir Bumi) serta status kini pembangunan industri REE.



**JAWAPAN**

Tuan Yang di-Pertua,

1. Dalam memastikan pembangunan industri NR-REE ini dilaksanakan secara terkawal dan teratur, KeTSA dengan kerjasama pelbagai agensi Kerajaan Persekutuan dan Kerajaan Negeri Perak telah membangunkan Prosedur Operasi Standard (SOP) Perlombongan NR-REE di Negeri Perak untuk pelaksanaan projek perintis perlombongan NR-REE di Negeri Perak. SOP ini telah diteliti oleh Jawatankuasa Eksekutif yang terdiri daripada individu-individu yang mempunyai pengetahuan dan kepakaran dalam bidang berkaitan perlombongan, hidrologi, hidrogeologi dan pembangunan lestari termasuk juga wakil daripada Badan Bukan Kerajaan (NGO) serta penggiat industri. Ia bertujuan untuk mewujudkan kerangka perlombongan yang bertanggungjawab dan mampan, di samping menjadi panduan kepada agensi-agensi kerajaan dan penggiat industri khususnya di Negeri Perak bagi memastikan industri ini tidak menjejaskan kelestarian alam sekitar.
2. SOP tersebut mengambil kira keseluruhan aktiviti perlombongan yang merangkumi tiga (3) peringkat utama iaitu pra-perlombongan, semasa perlombongan dan pasca perlombongan. Bagi setiap peringkat tersebut, disediakan prosedur yang perlu dipatuhi agar aktiviti yang dijalankan menepati kehendak perundangan dan keselamatan yang berkaitan. Pemakaian SOP tersebut akan dilaksanakan di tapak projek perintis perlombongan NR-REE di Mukim Kenering, Daerah Hulu Perak, Perak Darul Ridzuan.

## SOALAN NO: 34

3. Pemakaian Prosedur Operasi Standard (SOP) Industri Perlombongan Unsur Nadir Bumi Bukan Radioaktif (NR-NREE) ini akan diperluaskan ke lain-lain negeri dengan pindaan yang bersesuaian dengan negeri masing-masing setelah menerima hasil penilaian projek perintis perlombongan NR-REE di Negeri Perak. Inisiatif ini adalah sama seperti yang telah dilaksanakan seperti pemakaian SOP Aktiviti Perlombongan dan Pengeksportan Bauksit Negeri Pahang.
4. Kementerian juga telah diamanahkan oleh Jabatan Kastam Diraja Malaysia untuk mengawal selia aktiviti pengeksportan unsur nadir bumi melalui pindaan kepada Perintah Kastam (Larangan Mengenai Eksport) (Pindaan) 2021. Pindaan ini meletakkan kuasa mengeluarkan lesen eksport kepada Kementerian Tenaga dan Sumber Asli bagi unsur nadir bumi. Bagi peringkat awal, Kementerian menetapkan hanya unsur nadir bumi yang telah diproses sehingga *Rare Earth Carbonate* sahaja boleh dieksport.
5. Selain daripada pematuhan kepada SOP yang akan diluluskan, sebarang perlombongan NR-REE juga tertakluk kepada kelulusan Laporan Penilaian Kesan Alam Sekeliling (EIA) oleh Ketua Pengarah Jabatan Alam Sekitar (JAS) dan juga kelulusan Skim Pengendalian Melombong (OMS – Operational Mining Scheme) oleh Ketua Pengarah JMG.
6. Pada masa ini, tiada operasi perlombongan NR-REE yang diluluskan oleh pihak Kementerian atau JMG di negara ini. Cadangan pelaksanaan projek perintis bagi perlombongan NR-REE

di Negeri Perak masih lagi belum beroperasi memandangkan pertimbangan untuk kelulusan Skim Pengendalian Melombong hanya boleh dibuat setelah Prosedur Operasi Standard (SOP) Industri Perlombongan Unsur Nadir Bumi Bukan Radioaktif (NR-NREE) Negeri Perak dikuatkuasakan dan laporan EIA diluluskan.

7. Selain itu, Kementerian juga sedang merancang untuk membangunkan industri NR-REE diperingkat pertengahan melalui cadangan pewujudan Pelan Pusat Pemprosesan *Central Porcessing Plan* (CPP). Cadangan pewujudan CPP ini adalah bagi mengelakkan sumber NR-REE dieksport secara mentah ke luar negara serta pada masa sama, adalah untuk menggalakkan sumber mineral NR-REE diproses bagi mendapatkan nilai tambah yang tinggi.
8. Kementerian juga berpandangan pelaksanaan sistem pensijilan seperti Malaysian Sustainable Palm Oil (MSPO) untuk industri minyak sawit dan Malaysian Timber Certification Scheme (MTCS) untuk industri balak boleh dijadikan sebagai penanda aras untuk mengesahkan industri mineral dijalankan secara bertanggungjawab dan mampan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : YB DATO' DR. MOHD KHAIRUDDIN BIN  
AMAN RAZALI  
[KUALA NERUS]**

**TARIKH : 15 MAC 2022 (SELASA)**

**SOALAN**

**DATO' DR. MOHD KHAIRUDDIN BIN AMAN RAZALI [ KUALA NERUS ]** minta **MENTERI KEWANGAN** menyatakan senarai entiti perniagaan syarikat-syarikat besar yang menerima pinjaman tanpa cagaran seperti Genting Hong Kong yang telah diisytiharkan muflis baru-baru ini.

**JAWAPAN**

**Tan Sri Yang Di-Pertua,**

Senarai entiti perniagaan tidak boleh dinyatakan kerana dilindungi di bawah peruntukan Seksyen 132 Akta Perkhidmatan Kewangan 2013 dan Seksyen 144 Akta Perkhidmatan Kewangan Islam 2013.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : TUAN SABRI BIN AZIT [ JERAI ]**

**TARIKH : 15 MAC 2022 (SELASA)**

**SOALAN**

**TUAN SABRI BIN AZIT [ JERAI ]** minta **MENTERI KANAN PENDIDIKAN** menyatakan apakah Kementerian bersetuju dengan cadangan bagi mewujudkan perjawatan khas warden asrama sepenuh masa agar dapat mengurangkan bebanan tugas guru-guru yang menjadi warden sedia ada.

**JAWAPAN**

**Tuan Yang di-Pertua,**

Kementerian Pendidikan Malaysia (KPM) sentiasa prihatin terhadap beban tugas guru yang menjadi warden dan mencari kaedah terbaik bagi mengatasi perkara ini di sekolah. Buat masa ini, KPM sedang memperhalusi semua aspek berkaitan cadangan penambahbaikan portfolio warden asrama untuk dibincangkan dengan agensi pusat. Sebarang cadangan mewujudkan jawatan khas adalah tertakluk kepada persetujuan agensi pusat dan kedudukan kewangan semasa Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : YB DATO' DR. MOHD KHAIRUDDIN BIN  
AMAN RAZALI  
[KUALA NERUS]**

**TARIKH : 15 MAC 2022 (SELASA)**

**SOALAN**

**DATO' DR. MOHD KHAIRUDDIN BIN AMAN RAZALI [ KUALA NERUS ]** minta **MENTERI KEWANGAN** menyatakan perubahan unjuran pertumbuhan ekonomi pada tahun ini mengambil kira situasi peningkatan kes varian Omicron yang dilihat semakin membimbangkan.

**JAWAPAN**

**Tan Sri Yang di-Pertua,**

Trajektori pertumbuhan ekonomi pada 2022 adalah berdasarkan kepada jangkaan aktiviti ekonomi global dan domestik yang terus berkembang. Momentum pertumbuhan Keluaran Dalam Negeri Kasar (KDNK) tahun 2021 padar kadar 3.1% dijangka terus menyokong pertumbuhan ekonomi negara ke arah mencapai tahap seperti sebelum pandemik COVID-19. Namun begitu, risiko kepada prospek pertumbuhan KDNK tahun 2022 masih kekal susulan daripada kemunculan varian COVID-19 baharu seperti Omicron dan gangguan rantai bekalan. Walaupun Bank Dunia dan Tabung Kewangan Antarabangsa (IMF) telah menyemak semula unjuran pertumbuhan global tahun 2022 kepada kadar yang lebih perlahan iaitu 4.1% (Bank Dunia) dan 4.4% (IMF), unjuran terkini pertumbuhan ekonomi Malaysia tahun 2022 oleh kedua-dua badan dunia tersebut adalah masih dalam lingkungan unjuran Kerajaan iaitu di antara 5.5% hingga 6.5% (Bank Dunia: 5.8%; IMF: 5.7%).

Kerajaan terus komited untuk melindungi rakyat dan memastikan kesinambungan pemulihan sosio-ekonomi negara melalui pelaksanaan dasar-dasar yang bertujuan untuk merancakkan aktiviti ekonomi dan sosial. Jangkaan pertumbuhan ekonomi yang lebih baik pada 2022 akan didorong terutamanya oleh pelaksanaan langkah di bawah Bajet 2022 yang masih bersifat mengembang (*expansionary*), normalisasi dalam aktiviti ekonomi dan sosial selaras dengan kadar vaksinasi yang tinggi, penyambungan semula projek infrastruktur dengan kesan pengganda yang tinggi serta permintaan luar yang kukuh, terutamanya daripada rakan dagangan utama.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : Y.B. TUAN CHAN MING KAI  
[ALOR SETAR]**

**TARIKH : 15 MAC 2022 (SELASA)**

**SOALAN**

**TUAN CHAN MING KAI [ ALOR SETAR ]** minta **MENTERI KEWANGAN** menyatakan berapa Borang B atau Borang BE yang diterima daripada Ahli Parlimen serta jumlah cukai pendapatan yang telah dibayar serta tunggakan.



**JAWAPAN**

**Tan Sri Yang di-Pertua,**

Bilangan Borang B atau BE yang diterima daripada Ahli Parlimen bagi Tahun Taksiran 2019 ialah sebanyak tiga ratus empat puluh tiga helai manakala bagi Tahun Taksiran 2020 pula ialah sebanyak tiga ratus sembilan belas helai.

Semakan data daripada Lembaga Hasil Dalam Negeri Malaysia mendapati bahawa cukai berjumlah hampir dua belas juta dua ratus sembilan puluh dua ribu ringgit (RM12,291,709) telah dibayar oleh Ahli Parlimen bagi Tahun Taksiran 2019. Manakala bagi Tahun Taksiran 2020 pula, cukai berjumlah lebih sepuluh juta sembilan ratus enam ribu ringgit (RM10,906,249) telah dijelaskan. Ini menjadikan jumlah kutipan hasil yang dikutip bagi dua tahun berkenaan adalah bernilai hampir dua puluh tiga juta seratus sembilan puluh lapan ringgit (RM23,197,958).

Bagi cukai yang belum dijelaskan, jumlah bagi Tahun Taksiran 2019 ialah sebanyak dua ratus lapan puluh ribu seratus lima puluh lapan ringgit (RM280,158) dan bagi Tahun Taksiran 2020 pula, jumlahnya ialah sebanyak hampir satu juta empat ratus lapan puluh tujuh ribu lima ratus ringgit (RM1,487,458). Oleh itu, secara keseluruhannya Ahli Parlimen perlu menjelaskan cukai berjumlah lebih satu juta tujuh ratus enam puluh tujuh ribu enam ratus ringgit (RM1,767,617) bagi tempoh 2019 dan 2020.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : TUAN MUHAMMAD BAKHTIAR BIN  
WAN CHIK [ BALIK PULAU ]**

**TARIKH : 15 MAC 2022 (SELASA)**

**SOALAN**

**TUAN MUHAMMAD BAKHTIAR BIN WAN CHIK [ BALIK PULAU ]** minta **MENTERI PELANCONGAN, SENI DAN BUDAYA** menyatakan sejauh mana agensi di bawah Kementerian seperti Balai Seni Negara, Istana Budaya, Jabatan Muzium Negara dan lainnya dimanfaatkan sepanjang tempoh persekolahan ditutup.

**JAWAPAN**

**Tuan Yang di-Pertua,**

1. Sepanjang tempoh persekolahan ditutup sama ada disebabkan oleh Perintah Kawalan Pergerakan (PKP) mahupun cuti persekolahan, Kementerian Pelancongan, Seni dan Budaya (MOTAC) melalui Jabatan dan Agensinya giat menganjurkan pelbagai program berbentuk pendidikan, pertandingan mahupun hiburan secara atas talian dan fizikal bagi mencapai khalayak bukan sahaja dalam kalangan masyarakat umum bahkan golongan pelajar di setiap peringkat pengajian.
2. Kebanyakan program yang dijalankan secara atas talian menggunakan platform *Facebook Live* dan *zoom*. Program / aktiviti berbentuk ilmiah yang telah diadakan termasuklah webinar, program bual bicara seperti forum dan wacana minda, ceramah, bengkel, perkongsian ilmu serta paparan video. Contoh program atas talian yang telah diadakan termasuklah perkongsian pengetahuan mengenai kraf tempatan melalui program pengembangan ilmu dan kemahiran kraf yang meliputi aktiviti seperti Wacana Kraf dan video DIY. Turut diadakan secara atas talian dengan skala besar adalah seminar antarabangsa yang melibatkan barisan panel dari luar negara iaitu *Webinar World Craft Council (WCC): Sustainability in Crafts*.
3. Selain itu, Panggung Seni Tradisional bawah kelolaan JKKN yang secara lazimnya mengadakan persembahan secara fizikal, turut diadakan secara berjadual atas talian. Pelbagai kuiz dan pertandingan turut diadakan seperti Kuiz Seni Budaya, pertandingan seni lukis, fotografi, Sayembara Dendangan Syair, Pertandingan Lestari Pantun Warisan, serta pertandingan tarian dan sebagainya.
4. Selepas Kerajaan membenarkan program / aktiviti dilakukan dengan pematuhan SOP, MOTAC melalui Jabatan dan Agensinya telah mengadakan pelbagai program secara fizikal, sebagai contoh, “Pameran Wabak Sedunia: Pandemik, Epidemik & Endemik” yang dianjurkan oleh Jabatan Muzium Malaysia. Persembahan pentas di Istana Budaya juga turut diadakan seperti “Konsert Orkestra Tradisional Malaysia: Rentak Kita” dan “Konsert Patriotik Tanah Air ku”.

## SOALAN NO : 39

5. Program secara fizikal lain yang berbentuk pengalaman anjuran Jabatan Muzium Malaysia adalah seperti Program Nostalgia Anak Kampung yang memberi peluang kepada generasi muda untuk mengenali dan merasai sendiri pengalaman melakukan pelbagai aktiviti menarik bertemakan kehidupan kampung.
6. Selain itu, bengkel-bengkel berbentuk *hands-on* seperti “Bengkel Pensel Warna Bersama UNEH” dan Aktiviti ‘*Drink & Doodle*’ anjuran Balai Seni Negara, dan Bengkel Eksplorasi Pengkalan Data oleh Perpustakaan Negara Malaysia turut diadakan.
7. Kesemua program secara fizikal yang telah dilaksanakan oleh Jabatan dan Agensi di bawah Kementerian ini susulan pematuhan kepada SOP yang ditetapkan. Namun secara keseluruhannya, program yang dilaksanakan masih mendapat sambutan yang menggalakkan daripada kalangan masyarakat termasuklah pelajar sekolah rendah, menengah dan penuntut institut pengajian tinggi.
8. Bagi tahun 2022 dan seterusnya, MOTAC bersama Jabatan dan Agensinya terus komited dan proaktif dalam merancang dan menganjurkan program serta aktiviti yang memberi manfaat kepada setiap lapisan masyarakat terutama kepada golongan pelajar sepanjang tempoh cuti persekolahan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DATUK HAJI SHABUDIN BIN YAHAYA  
[ TASEK GELUGOR ]**

**TARIKH : 15 MAC 2022 (SELASA)**

**SOALAN**

**DATUK HAJI SHABUDIN BIN YAHAYA [ TASEK GELUGOR ]** minta **MENTERI PELANCONGAN, SENI DAN BUDAYA** menyatakan apakah sokongan dan bantuan yang diberikan kepada pengusaha tapak perkhemahan dan rekreasi yang semakin bertambah di negara ini.

**JAWAPAN**

**Tuan Yang di-Pertua,**

1. Kementerian Pelancongan, Seni dan Budaya (MOTAC) sentiasa menyokong dan menggalakkan kewujudan produk-produk pelancongan negara yang baru dalam terus memberi pilihan dan tarikan kepada pelancong sama ada dari dalam mahupun dari luar negara. Dalam hal ini, kewujudan produk-produk pelancongan baharu seperti tapak perkhemahan dan rekreasi yang semakin bertambah di negara ini adalah tidak terkecuali.
2. Bagi aktiviti pelancongan seperti tapak perkhemahan dan rekreasi ini, antara perkara utama yang perlu diberi perhatian dalam pembangunan produk ini adalah ketersediaan kemudahan dan infrastruktur seperti tapak dan fasiliti seperti sambungan tenaga elektrik, perparitan dan saliran untuk air kumbahan dan sebagainya. Kemudahan infrastruktur dan prasarana ini perlu ada bagi kemudahan dan keselesaan pelancong yang menggunakan produk pelancongan ini.
3. Bagi tujuan ini, ia berkait rapat dengan bidang kuasa dan tugas utama Kementerian dan agensi Kerajaan Pusat dan juga negeri, termasuklah Kementerian Perumahan dan Kerajaan Tempatan (KPKT) serta Pihak-pihak Berkuasa Tempatan (PBT). MOTAC sentiasa memberikan kerjasama pelbagai agensi Kerajaan Pusat dan Negeri tersebut dalam usaha menyediakan kemudahan infrastruktur dan prasarana asas untuk pelancong.
4. Dalam hal ini, MOTAC melalui Pejabat-pejabat MOTAC Negeri di seluruh negara turut sentiasa bekerjasama rapat dengan Kerajaan-Kerajaan Negeri dalam usaha untuk memastikan kemudahan infrastruktur dan prasarana asas untuk pelancong disediakan dan diselenggara dalam memastikan standard dan kualiti perkhidmatan sentiasa berada pada tahap yang tinggi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

---

**PERTANYAAN : JAWAB LISAN**

**DARIPADA : YB PUAN HANNAH YEOH TSEOW SUAN  
[ SEGAMPUT ]**

**TARIKH : 15 MAC 2022 (SELASA)**

**SOALAN**

**Puan Hannah Yeoh Tseow Suan [ Segambut ]** minta **MENTERI PEMBANGUNAN WANITA, KELUARGA DAN MASYARAKAT** menyatakan status terkini usaha Kementerian menyelaras dasar dan hala tuju bersama antara pihak Kementerian Kesihatan dan Pihak Berkuasa Tempatan (PBT) melibatkan garis panduan penubuhan, kelulusan, pelesenan dan mekanisme '*confinement centres*'.

**JAWAPAN**

Tuan Yang di-Pertua,

Untuk makluman YB Segambut, buat masa ini, tadbir urus '*Confinement Centres*' atau Pusat Perkhidmatan Ibu Selepas Bersalin secara keseluruhannya adalah di luar bidang fungsi Kementerian Pembangunan Wanita, Keluarga dan Masyarakat (KPWKM) atau mana-mana Kementerian lain.

Melihat kepada situasi tersebut dan sebagai langkah proaktif, KPWKM telah mula meneliti keperluan dan bidang fungsi agensi yang bersesuaian bagi tujuan mengawal selia perkhidmatan ini termasuk mekanisme pelaksanaannya dengan mengambil kira aspek keselamatan dan kebajikan golongan wanita dan kanak-kanak. Dalam hal ini, beberapa sesi libat urus telah diadakan bersama agensi terlibat seperti Kementerian Kesihatan Malaysia (KKM), Kementerian Perumahan dan Kerajaan Tempatan (KPKT), Jabatan Kebajikan Masyarakat, Lembaga Penduduk dan Pembangunan Keluarga Negara (LPPKN) dan Suruhanjaya Syarikat Malaysia (SSM) bagi mendapatkan maklumat berkaitan perundangan, pendaftaran, pengoperasian, pelesenan dan penguatkuasaan yang sedia ada.

Namun, perkara ini masih di peringkat perbincangan bagi penetapan satu keputusan dasar berkaitan tadbir urus *confinement centres* yang dicerminkan sebagai salah satu sistem sokongan keluarga di samping pembangunan model pelaksanaan yang terbaik untuk menjamin kesihatan serta keselamatan ibu dan bayi terlibat.

Adalah diharap menerusi kerjasama bersepadu ini dapat membantu keluarga mendapatkan perkhidmatan yang baik dan selamat di samping memberi lebih banyak peluang penyertaan golongan wanita dalam pasaran kerja, sekali gus membantu meningkatkan ekonomi negara.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : YB TUAN SIM TZE TZIN ( BAYAN BARU )**

**TARIKH : 15 MAC 2022 (SELASA)**

**SOALAN NO. 42**

**TUAN SIM TZE TZIN [ BAYAN BARU ]** minta **MENTERI PENGANGKUTAN** menyatakan bagaimanakah pihak Malaysia Airport Berhad (MAB) memindahkan SJKC Chung San yang bersejarah yang terjejas akibat Projek Pembesaran Lapangan Terbang Antarabangsa Pulau Pinang. Bagaimanakah MAB membantu pemindahan dan pembinaan sekolah baru untuk sekolah tersebut.

**JAWAPAN:**

**Tuan Yang Dipertua,**

1. Kementerian Pengangkutan (MOT) melalui suratnya bertarikh 4 Januari 2022 kepada pihak sekolah telah memaklumkan hasrat Kerajaan untuk membuat pengambilan tanah tapak SJKC Chung Shan bagi tujuan pembesaran Lapangan Terbang Antarabangsa Pulau Pinang (LTAPP).
2. Selanjutnya, MOT bersama pihak MAHB telah mengadakan perbincangan awal pada 11 Januari 2022 dengan wakil Lembaga Pengurusan Sekolah (LPS) SJKC Chung Shan berhubung cadangan pengambilan tanah sekolah untuk projek pembesaran LTAPP. Perbincangan tersebut turut disertai oleh wakil Pejabat Ketua Menteri Pulau Pinang dan wakil Pejabat Tanah Daerah Barat Daya Pulau Pinang.
3. Berdasarkan perbincangan tersebut, wakil Kerajaan Negeri Pulau Pinang telah memaklumkan tentang cadangan lokasi baharu iaitu di Lot 8011, Mukim 12, Daerah Barat Daya sebagai tapak ganti sekolah yang baharu bagi tujuan pemindahan SJKC Chung Shan. Dalam hubungan ini, LPS SJKC Chung Shan telah diminta untuk membuat keputusan dan seterusnya memaklumpkannya secara rasmi kepada Pejabat Ketua Menteri Pulau Pinang untuk tindakan sewajarnya.
4. Pihak MOT dan MAHB akan mengadakan perbincangan lanjut dengan wakil Pejabat Ketua Menteri Pulau Pinang, Pejabat Tanah Daerah Barat Daya Pulau Pinang dan Jabatan Pendidikan Negeri Pulau Pinang untuk memperincikan proses pengambilan tanah setelah menerima persetujuan bertulis daripada Lembaga Pengurusan Sekolah (LPS) berhubung cadangan lokasi baharu tersebut. Setelah itu, perbincangan mengenai cadangan pemindahan dan pembinaan sekolah akan turut dibincangkan dengan Kerajaan Negeri Pulau Pinang dan agensi-agensi yang terlibat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS TAHUN 2022**

**PERTANYAAN : LISAN**

**DARIPADA : PUAN NURUL IZZAH BINTI ANWAR  
[ PERMATANG PAUH ]**

**TARIKH : 15 MAC 2022 (SELASA)**

**SOALAN**

**PUAN NURUL IZZAH BINTI ANWAR [ PERMATANG PAUH ]** minta  
**MENTERI PERTANIAN DAN INDUSTRI MAKANAN** menyatakan :-

- (a) jumlah penternak kecil dan sederhana yang telah gulung tikar semenjak 2020; dan
- (b) mekanisme agihan yang digunakan bagi pemberian subsidi dedak membabitkan peruntukan RM528.52 juta serta kecepatan tempoh penternak yang memohon akan menerima subsidi.

**JAWAPAN**

**Tuan Yang di-Pertua,**

Untuk makluman Ahli Yang Berhormat, berdasarkan data Jabatan Perkhidmatan Veterinar (DVS), menunjukkan semua ladang ayam sedia ada bagi kategori penternak kecil dan sederhana masih aktif beroperasi. Data tahun 2021 juga menunjukkan berlaku peningkatan jumlah ladang sebanyak 2.9% berbanding tahun 2020. Pada tahun 2021 jumlah ladang adalah sebanyak 2,441 buah berbanding 2,372 buah pada tahun 2020.

Namun begitu terdapat penternak yang mengurangkan operasi pengeluaran ayam mereka akibat daripada kos operasi yang meningkat. Antaranya disebabkan oleh peningkatan kos makanan yang merangkumi 70% daripada kos keseluruhan, kos logistik, kos pekerja dan kadar tukaran mata wang asing.

Bagi membantu penternak dan memastikan bekalan ayam tidak terjejas, Kerajaan telah bersetuju memberi subsidi sebanyak RM0.60/kg pada harga borong ayam hidup di ladang dan RM0.05/biji bagi telur gred A, B dan C dengan jumlah keseluruhan peruntukan sebanyak RM528.52 juta. Pemberian subsidi adalah untuk pengeluaran bermula dari 5 Februari hingga 5 Jun 2022. Permohonan subsidi telah dibuka mulai 28 Februari sehingga 6 Jun 2022 melalui DVS Negeri.

Untuk mendapatkan bantuan subsidi tersebut, penternak perlu mengemukakan permohonan melalui borang yang boleh didapati di laman sesawang Jabatan Perkhidmatan Veterinar [www.dvs.gov.my](http://www.dvs.gov.my). Semua permohonan yang dikemukakan penternak akan dinilai di peringkat lapangan di negeri dan dipertimbangkan oleh Jawatankuasa di peringkat Putrajaya untuk kelulusan tuntutan. Bagi permohonan yang berjaya, tuntutan subsidi akan dikreditkan ke dalam akaun penternak melalui Agrobank dalam tempoh satu (1) hingga tiga (3) hari.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA 2022, PENGGAL KELIMA,  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : TUAN KARUPAIYA A/L MUTUSAMI  
[PADANG SERAI]**

**TARIKH : 15 MAC 2022 (ISNIN)**

**SOALAN**

**TUAN KARUPAIYA A/L MUTUSAMI [PADANG SERAI]** minta **MENTERI KOMUNIKASI DAN MULTIMEDIA** menyatakan penjelasan berkaitan liputan rangkaian internet di kawasan Parlimen Padang Serai. Laporan mendapati liputan internet di kawasan Padang Serai sering mengalami masalah capaian.

**JAWAPAN**

Tuan Yang Dipertua,

Setakat suku keempat 2021, di bawah pelan JENDELA sebanyak tambahan 2 menara komunikasi telah siap dibina dan diaktifkan manakala sebanyak 3 lagi menara komunikasi baharu berada di peringkat perancangan untuk dilaksanakan di Parlimen Padang Serai. Selain itu, sebanyak 178 stesen pemancar telah siap dinaiktaraf ke 4G. Bagi pelaksanaan infrastruktur jalur lebar gentian optik pula, setakat suku keempat 2021, sebanyak 16,410 premis telah tersedia dengan sambungan gentian optik melebihi 5,987 premis sasaran awal yang telah dirancang.

Selain daripada itu, pihak Suruhanjaya Komunikasi dan Multimedia Malaysia (SKMM) juga telah merancang untuk menjalankan aktiviti audit pengukuran kualiti perkhidmatan bagi semua pembekal perkhidmatan di seluruh Malaysia. Sepanjang tahun 2022, sebanyak 3,000 lokasi telah dirancang seluruh Malaysia bagi aktiviti audit pengukuran ini yang mana memfokuskan semua lokasi yang pernah menerima aduan liputan dalam tahun 2021 termasuklah di Parlimen Padang Serai.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : YB DATO' SRI ABDUL AZEEZ BIN ABDUL  
RAHIM ( BALING )**

**TARIKH : 15 MAC 2022 (SELASA)**

**SOALAN NO. 45**

**DATO' SRI ABDUL AZEEZ BIN ABDUL RAHIM [ BALING ]** minta **MENTERI PENGANGKUTAN** menyatakan tindakan Kerajaan untuk mengelakkan amalan monopoli sesebuah syarikat dalam penyediaan perkhidmatan pusat saringan COVID-19 kepada para penumpang pesawat yang mendarat di Lapangan Terbang Antarabangsa Kuala Lumpur yang telah mengenakan harga yang tinggi kepada pengguna yang akhirnya akan membebankan rakyat.

**JAWAPAN:**

**Tuan Yang Dipertua,**

1. Malaysia Airports Holdings Berhad (MAHB) pada 28 Mei 2021 telah melantik syarikat BP Lab Sdn. Bhd. untuk menyediakan ujian saringan COVID-19 di Lapangan Terbang Antarabangsa Kuala Lumpur (KLIA) sebagai alternatif kepada para penumpang, selain daripada kemudahan ujian saringan COVID-19 yang disediakan oleh Kementerian Kesihatan Malaysia (KKM). Pelantikan syarikat swasta ini merupakan salah satu usaha pihak MAHB untuk membantu mengurangkan kesesakan dan masa menunggu penumpang di KLIA bagi mendapatkan keputusan ujian saringan COVID-19 setelah pintu sempadan dibuka sepenuhnya kelak.

2. Dalam hubungan ini, bagi mengelakkan amalan monopoli sesebuah syarikat dalam penyediaan perkhidmatan pusat saringan COVID-19 kepada para penumpang pesawat yang mendarat di KLIA, pihak MAHB telah mula melaksanakan proses tender secara terbuka bagi melantik pengendali kedua di lapangan terbang tersebut. Pelantikan pengendali kedua dijangka dapat diselesaikan pada suku pertama tahun 2022.

3. Pengenaan caj ujian saringan dibuat berasaskan kepada kos operasi dan pelaburan yang telah dibuat oleh syarikat yang berkaitan mengambilkira caj-caj yang telah dikenakan di lapangan terbang serantau. Dalam hubungan ini, caj yang dikenakan adalah munasabah dan berpatutan.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DATUK DR. HASAN BIN BAHROM  
[ TAMPIN ]**

**TARIKH : 15 MAC 2022 (SELASA)**

**SOALAN**

**DATUK DR. HASAN BIN BAHROM [ TAMPIN ]** minta **MENTERI PERTANIAN DAN INDUSTRI MAKANAN** menyatakan apakah tindakan yang Kementerian boleh lakukan terhadap kemusnahan binatang ternakan akibat banjir dan bagaimana Kementerian dapat membantu memulihkan para penternak membangunkan semula usaha yang telah musnah akibat daripada banjir yang berlaku.

**JAWAPAN**

Tuan Yang di-Pertua,

Untuk makluman Ahli Yang Berhormat, fenomena banjir yang sering berlaku turut menjejaskan para penternak. Kementerian Pertanian dan Industri Makanan (MAFI) sentiasa membantu penternak yang terkesan untuk memulihkan semula aktiviti penternakan mereka. Antara langkah yang diambil ialah:

- (i) Mengaktifkan Bilik Bencana Banjir dan menggerakkan pegawai dan kakitangan bagi menyelaras dan membantu memindahkan ternakan dari kawasan terjejas ke kawasan lebih selamat;
- (ii) Program Pembangunan Semula Projek Agromakanan (PPSPA) dengan memberi bantuan berbentuk barangan (*in-kind*) seperti bahan binaan untuk baik pulih kandang/ reban, logistik, gantian ternakan, makanan ternakan dan ubat-ubatan,
- (iii) Bantuan MAFI Prihatin Pasca Banjir; dan
- (iv) Khidmat nasihat dan perkhidmatan teknikal veterinar seperti rawatan ternakan yang sakit dan program kesihatan gerompok menerusi pegawai-pegawai pengembangan di lapangan.

Pada kejadian banjir tahun 2021, seramai 286 penternak yang terjejas akibat banjir telah menerima bantuan dan melibatkan peruntukkan sebanyak RM1,466,805.00. Ia melibatkan beberapa buah negeri iaitu Kedah, Pulau Pinang, Perak, Pahang, Negeri Sembilan, Kelantan, Selangor dan Kedah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

---

**PERTANYAAN : JAWAB LISAN**

**DARIPADA : YB PUAN KASTHURIRAANI A/P PATTO  
[ BATU KAWAN ]**

**TARIKH : 15 MAC 2022 (SELASA)**

**SOALAN**

**Puan Kasthuriraani A/P Patto [ Batu Kawan ]** minta **MENTERI PEMBANGUNAN WANITA, KELUARGA DAN MASYARAKAT** menyatakan apakah peruntukan sebenar bagi program Bantuan Modal Perniagaan Khas Untuk Wanita melalui MyKasih Kapital, bilangan wanita-wanita yang telah menerima geran bantuan ini dan amaun, baki peruntukan bantuan modal perniagaan ini serta penerima bantuan mengikut pecahan negeri serta nyatakan KPI program bantuan modal perniagaan ini.

**JAWAPAN**

Tuan Yang di-Pertua,

Program MyKasih Kapital merupakan bantuan berbentuk keusahawanan sosial dan kebajikan produktif yang diberikan kepada rakyat Malaysia khususnya kepada golongan wanita pencari nafkah utama keluarga yang sedang bergelut dengan masalah kewangan bagi menjana semula ekonomi keluarga. Geran bantuan perniagaan ini diberikan khusus kepada golongan wanita bagi memperkasa ekonomi keluarga dalam mengharungi cabaran pandemik COVID-19 pada masa kini.

MyKasih Kapital merupakan insentif tambahan kerajaan yang telah diumumkan sempena Sambutan Hari Wanita pada 8 Mac 2021 sebagai suntikan modal perniagaan berbentuk keusahawanan khusus kepada golongan wanita. Sebanyak **RM2 juta telah diperuntukkan** bagi melaksanakan program ini yang telah bermula sejak April 2021.

Bantuan MyKasih Kapital ini telah selesai disalurkan pada tahun 2021 kepada **4,000 orang penerima geran** yang berkeelayakan melibatkan peruntukan sebanyak **RM2 juta**. Pemberian insentif secara *one-off* dengan **modal sebanyak RM500.00** diberikan sebagai usaha permulaan kepada mereka untuk menggalakkan wanita berniaga di samping membantu mereka menjana semula ekonomi keluarga melalui perniagaan menggunakan platform e-dagang/*dropship*.

Sejak dilaksanakan, program ini telah mendapat penyertaan yang menggalakkan dan kesemua peserta yang berkeelayakan telah melalui proses saringan sebelum diberi bimbingan melalui pelbagai aktiviti dan program keusahawanan yang dianjurkan melalui kerjasama rakan strategik KPWKM.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : TUAN LIM GUAN ENG [ BAGAN ]**

**TARIKH : 15 MAC 2022 (SELASA)**

**SOALAN**

Minta **MENTERI TENAGA DAN SUMBER ASLI** menyatakan sebab Kerajaan tidak mengarahkan Tenaga Nasional Bhd. untuk menangguhkan kenaikan tarif elektrik kepada 1.6 juta perniagaan dan industri setinggi 20% sehingga kemelesetan ekonomi reda. Nyatakan rasionalnya membenarkan sebuah syarikat untung dengan membebankan seluruh rakyat Malaysia serta kesan ke atas kenaikan harga barangan.

**JAWAPAN**

Tuan Yang di-Pertua,

Untuk makluman Ahli Yang Berhormat,

1. Kerajaan mempunyai mekanisme khusus bagi penetapan purata tarif asas elektrik yang telah diguna pakai sejak tahun 2014 iaitu berdasarkan mekanisme *Incentive Based Regulation* (IBR). Melalui IBR ini, purata tarif asas di Semenanjung Malaysia untuk Tenaga Nasional Berhad (TNB) akan dikaji tiga (3) tahun sekali berserta dengan penetapan parameter-parameter untuk perniagaan TNB yang dikawal selia oleh Kerajaan melalui Suruhanjaya Tenaga (ST). Selain itu, Kerajaan juga mempunyai mekanisme khusus bagi pelarasan tarif elektrik iaitu melalui *Imbalance Cost Pass-Through* (ICPT) yang disemak setiap enam (6) bulan. Mekanisme ICPT ini adalah penting memandangkan TNB telah membuat bayaran bagi semua kos penjanaan tenaga elektrik di Semenanjung bagi enam bulan yang terdahulu, maka bagi enam bulan yang berikutnya, mekanisme ICPT membenarkan segala kos yang telah dibuat oleh TNB dilepaskan kepada pengguna sama ada dalam bentuk rebat atau surcuj. Kerajaan pada 26 Januari 2022 telah meluluskan pelaksanaan tempoh regulatori ketiga (RP3) bagi tahun 2022 hingga 2024 di bawah mekanisme IBR.
2. Bagi tempoh 1 Januari hingga 31 Disember 2021, Kerajaan telah melepaskan rebat 2 sen/kWj kepada semua kategori pengguna di Semenanjung. Pemberian rebat ini melibatkan kos keseluruhan sebanyak RM2.27 bilion.

3. Bagi tempoh Julai hingga Disember 2021, kos ICPT yang terlibat adalah sebanyak RM1.672 bilion bersamaan surcaj 3.70 sen/kWj yang perlu dilepaskan kepada semua pengguna elektrik di Semenanjung. Pelepasan surcaj ICPT sebanyak 3.70 sen/kWj kepada pengguna bagi tempoh Februari 2022 hingga Jun 2022 tidak dapat dielakkan berikutan kenaikan harga arang batu sehingga USD105.09/metrik tan berbanding unjuran harga arang batu yang ditetapkan pada tahun 2021 iaitu sebanyak USD67.45/metrik tan. Peningkatan harga arang batu yang ketara ini telah menyebabkan kos penjanaan berasaskan arang batu meningkat sebanyak 45% bagi tempoh Julai hingga Disember 2021.
4. Sebarang kenaikan dalam harga arang batu memberi impak yang besar kepada tarif elektrik di Semenanjung kerana 59% penjanaan elektrik adalah daripada sumber arang batu. Selain itu, kenaikan pertukaran mata wang asing bagi tempoh Julai hingga Disember 2021 iaitu pada kadar RM4.246 untuk setiap USD1.00 berbanding unjuran iaitu pada kadar RM4.212 bagi setiap USD1.00 turut menjadikan kos penjanaan meningkat.
5. Selain itu, sebarang penangguhan pelaksanaan ICPT akan memberi implikasi yang lebih signifikan kepada pengguna pada kitaran ICPT akan datang iaitu untuk tempoh Julai hingga Disember 2022. Ini kerana, kos ICPT bagi tempoh Julai hingga Disember 2022 dianggarkan lebih tinggi iaitu sebanyak RM5.736 bilion atau bersamaan **surcaj 10.55 sen/kWj** berdasarkan unjuran yang dibuat oleh Suruhanjaya Tenaga. Sekiranya kos ICPT bagi tempoh Februari hingga Jun 2022 ditangguhkan sehingga bulan Julai hingga Disember 2022, kos ICPT yang akan dilepaskan kepada semua

pengguna adalah sebanyak 13.63 sen/kWj. Hal ini akan menyebabkan kesan yang lebih buruk kepada pengguna elektrik serta menjejaskan kedudukan kewangan negara.

6. Kerajaan menyedari bahawa sekiranya surcaj dilepaskan kepada semua pengguna seperti yang sepatutnya dilaksana berdasarkan mekanisme ICPT, pasti rakyat akan merasa terbeban disebabkan kenaikan tarif elektrik. Oleh itu, Kerajaan telah memutuskan supaya rebat 2 sen/kWj diteruskan kepada semua pengguna domestik bagi tempoh Februari sehingga Jun 2022 dengan membelanjakan RM715 juta daripada dana Kumpulan Wang Industri Elektrik (KWIE). Dalam masa yang sama, TNB telah menyerap kos ICPT pada bulan Januari 2022 sebanyak RM181 juta walaupun kos tersebut sepatutnya dilepaskan kepada semua pengguna.
7. Bagi menghadapi situasi ini, saya ingin menyarankan agar pengguna-pengguna bukan domestik untuk melanggan inisiatif *Green Electricity Tariff* (GET). Ia bukan sahaja dapat mengecualikan pelanggan GET daripada membayar surcaj ICPT untuk tempoh setahun, malah mereka akan turut memiliki *Renewable Energy Certificate* (REC) yang boleh membantu mereka memenuhi komitmen *Environmental, Social and Governance* (ESG), dengan izin, dan menyokong agenda Tenaga Boleh Baharu negara.
8. Selain itu, pengguna-pengguna bukan domestik turut dicadangkan untuk meneroka potensi solar melalui pemasangan sistem solar bagi kegunaan sendiri (*self-consumption* – SelCo) atau menyertai Program *Net Energy Metering 3.0* (NEM 3.0). Kementerian juga menyarankan pemain-pemain industri untuk mengamalkan



penggunaan elektrik secara cekap dengan menggunakan peralatan cekap tenaga yang mendapat penarafan 4 atau 5 bintang oleh pihak Suruhanjaya Tenaga. Inisiatif-inisiatif ini dapat membantu pengguna komersial dan industri untuk mengurangkan bil elektrik mereka pada masa akan datang.

9. Bagi memastikan kepentingan pengguna terpelihara, saya yakin Kementerian Perdagangan Dalam Negeri dan Hal Ehwal Pengguna (KPDNHEP) sentiasa giat melakukan pemantauan harga di pasaran agar tiada pihak yang tidak bertanggungjawab mengambil kesempatan untuk memanipulasi harga dengan menaikkan harga barang bagi mengaut keuntungan berlebihan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DATUK SERI PANGLIMA BUNG MOKTAR BIN  
RADIN [ KINABATANGAN ]**

**TARIKH : 15 MAC 2022 (SELASA)**

**SOALAN**

**DATUK SERI PANGLIMA BUNG MOKTAR BIN RADIN [KINABATANGAN ]** minta **MENTERI PELANCONGAN, SENI DAN BUDAYA** menyatakan apakah usaha-usaha yang sedang dan akan dibuat oleh Kementerian dalam membantu pengusaha-pengusaha pelancongan yang terjejas akibat pandemik COVID-19 agar perniagaan mereka dapat bertahan dalam industri ini. Berapa lama tempoh yang dijangkakan untuk industri pelancongan dapat dipulihkan jika sempadan negara dibuka bagi tujuan pelancongan.

**JAWAPAN**

**Tuan Yang di-Pertua,**

1. Seperti Ahli Yang Berhormat sedia maklum, Kementerian Pelancongan, Seni dan Budaya (MOTAC) sentiasa dan terus giat melaksanakan pelbagai inisiatif dalam memulih dan merancakkan kembali industri pelancongan negara.

2. Antara inisiatif yang sedang dilaksanakan adalah merancakkan Pelancongan Domestik menerusi:

- (i) pemberian baucar diskaun/rebat sebanyak RM20 juta bertujuan meningkatkan promosi pelancongan Malaysia dan juga kuasa membeli (*purchasing power*) pengguna ke atas produk-produk pelancongan, seni dan budaya; dan
- (ii) pemberian dana sokongan sebanyak RM5 juta bagi aktiviti promosi dan penggiat pelancongan dalam bentuk bantuan kewangan kepada persatuan/ kelab/ syarikat/ agensi pelancongan.

3. Walaupun sempadan antarabangsa negara belum dibuka sepenuhnya, MOTAC telah berusaha untuk memulakan pelancongan antarabangsa melalui pelaksanaan Projek Rintis Gelembung Pelancongan Antarabangsa Langkawi (LITB) bermula 15 November 2021. Usaha ini merupakan ujian rintis atau *pilot test* ke atas kesediaan keseluruhan ekosistem industri pelancongan terutamanya penggiat-penggiat industri dan agensi-agensi Kerajaan dalam menerapkan norma baharu serta membuka industri pelancongan kepada pelancong antarabangsa secara berperingkat dan selamat.

4. Pada tahun 2020 dan 2021, MOTAC telah memperuntukkan sebanyak RM61juta bagi penyaluran bantuan kewangan kepada lebih 20,000 pengusaha pelancongan yang berdaftar dengan MOTAC iaitu syarikat / agensi pelancongan (TOBTAB), ejen Syarikat Malaysia My Second Home (MM2H), pengusaha inap desa, pemandu pelancong dan pengusaha spa serta pusat urut kaki di seluruh negara.

## SOALAN NO : 49

5. Untuk tahun 2022 pula, Kerajaan akan terus menyalurkan bantuan-bantuan menerusi Bajet 2022 bagi membantu kelangsungan syarikat-syarikat pelancongan yang terjejas, antaranya:

- (i) RM600juta bagi Skim Pembiayaan Pelancongan PENJANA yang diselaraskan oleh Bank Negara Malaysia dengan kerjasama 12 institusi bank;
- (ii) RM600juta untuk inisiatif pelaksanaan Program Subsidi Upah yang akan memanfaatkan lebih 26,000 majikan dan 330,000 pekerja;
- (iii) RM85juta bagi Bantuan Khas Tunai kepada pengusaha pelancongan yang berdaftar dengan MOTAC. Bantuan ini akan memberi manfaat sehingga 10,000 orang pemandu pelancong, lebih 5,000 TOBTAB, 400 ejen syarikat MM2H, 500 pengusaha Spa dan Pusat Urutan Kaki, 3,100 pengusaha inap desa berdaftar dengan MOTAC, 6,000 usahawan kraf dan komuniti Orang Asli Mah Meri;
- (iv) RM30juta pemberian geran padanan bagi tujuan pembaikan hotel bajet serta geran pembaikan kepada lebih 3,300 pengusaha inap desa yang berdaftar dengan MOTAC;
- (v) pelanjutan beberapa galakan cukai termasuk pengecualian cukai pendapatan kepada penganjur aktiviti kesenian dan kebudayaan serta pertandingan sukan dan rekreasi bertaraf antarabangsa sehingga tahun taksiran 2025; dan
- (vi) pelanjutan pengecualian cukai pelancongan sehingga 31 Disember 2022.

## SOALAN NO : 49

6. Selain itu, MOTAC turut melanjutkan tempoh kelonggaran hal-hal berkaitan fi lesen dan kompaun kepada TOBTAB dan pemandu pelancong berlesen sehingga Jun 2022 bagi membantu penggiat industri pelancongan yang terkesan daripada penularan COVID-19, antaranya:

- (i) kelonggaran berkaitan kompaun;
- (ii) pengecualian fi kepada TOBTAB dan pemandu pelancong; dan
- (iii) kelonggaran syarat lesen kepada TOBTAB.

7. Untuk makluman, *The World Tourism Organization* (UNWTO) menjangkakan pelancongan dunia hanya akan kembali seperti keadaan pra-pandemik selepas tahun 2024. Di samping itu, penularan varian Omicron yang juga telah mengganggu fasa pemulihan industri pelancongan di seluruh dunia pada awal tahun 2022. Bagi tahun 2022 dan 2023, MOTAC akan terus menumpukan pada usaha-usaha pemulihan negara di samping merancang pembangunan industri pelancongan berpandukan Dasar Pelancongan Negara (DPN) 2020-2030.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : Y.B. DATO' SERI UTAMA HAJI MUKHRIZ  
TUN DR. MAHATHIR  
[JERLUN]**

**TARIKH : 15 MAC 2022 (SELASA)**

**SOALAN**

**DATO' SERI UTAMA HAJI MUKHRIZ TUN DR. MAHATHIR [ JERLUN ]** minta **MENTERI KEWANGAN** menyatakan berapa sebenarnya hutang yang ditanggung Kerajaan, baik secara langsung mahupun melalui jaminan pinjaman Syarikat Berkaitan Kerajaan antara tahun 2016 hingga 2022. Apakah jadual pembayaran semula hutang tersebut dan dari manakah sumber dana yang digunakan untuk tujuan itu.

**JAWAPAN**

**Tan Sri Yang di-Pertua,**

Paras hutang Kerajaan Persekutuan mencatat RM648.5 bilion (51.9% daripada KDNK) pada 2016 dan meningkat kepada RM686.8 bilion (50.0% daripada KDNK) pada 2017, RM741 bilion (51.2% daripada KDNK) pada 2018 dan RM793 bilion (52.4% daripada KDNK) pada 2019. Sejak krisis pandemik COVID-19 melanda, berikutan keperluan untuk membiayai pakej rangsangan dan pemulihan ekonomi untuk membantu kelangsungan hidup rakyat dan perniagaan serta mengurangkan impak krisis, hutang Kerajaan Persekutuan telah meningkat kepada RM879.6 bilion (62.1% daripada KDNK) pada 2020 dan seterusnya kepada RM979.8 bilion (63.4% daripada KDNK) pada 2021. Berkenaan nisbah hutang statutori di bawah Akta Langkah-Langkah Sementara bagi Pembiayaan Kerajaan (Penyakit Koronavirus 2019 (COVID-19)) (Pindaan) 2021, hutang ini juga telah meningkat kepada 57.9% kepada KDNK pada 2020 dan 59.7% pada 2021, namun masih tidak melebihi had statutori 65% KDNK, iaitu had yang telah dinaikkan pada Oktober lalu.

Sehingga akhir 2021, dari segi jadual pembayaran hutang atau profil kematangan hutang Kerajaan Persekutuan, sebanyak 43.4% daripada jumlah hutang akan matang dalam tempoh 5 tahun, 25.4% hutang akan matang dalam tempoh 6 hingga 10 tahun, manakala 31.2% akan matang selepas 10 tahun. Sumber pembayaran balik hutang ini adalah daripada pinjaman Kerajaan Persekutuan.

Sementara itu, hutang syarikat yang dijamin oleh Kerajaan mencatat RM187.2 bilion pada 2016 dan meningkat kepada RM238.2 bilion pada 2017, RM266.5 bilion pada 2018, RM275.4 bilion pada 2019 RM294.7 bilion pada 2020 dan RM310.4 bilion pada 2021. Profil kematangan hutang syarikat yang dijamin oleh Kerajaan ini terdiri daripada 33% hutang yang akan matang dalam tempoh 5 tahun, 17.3% hutang akan matang dalam tempoh 6 hingga 10 tahun dan 49.6% akan matang selepas 10 tahun. Sumber pembayaran balik jaminan hutang syarikat terbahagi kepada dua iaitu

## **NO SOALAN :51**

- sumber kewangan syarikat berkenaan bagi syarikat yang berkeupayaan untuk berbuat demikian; dan
- peruntukan Kerajaan disediakan bagi membantu syarikat yang tidak dapat menjana hasil yang mencukupi bagi bayaran balik hutang.

Kerajaan dari semasa ke semasa sentiasa memantau kedudukan kewangan kesemua syarikat yang dijamin bagi memastikan komitmen bayaran hutang dijelaskan tepat pada waktunya.

Sekian, terima kasih.



**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA 2022 PENGGAL KELIMA,  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : TUAN GOBIND SINGH DEO [ PUCHONG ]**

**TARIKH : 15 MAC 2022 (SELASA)**

**SOALAN**

**TUAN GOBIND SINGH DEO [PUCHONG]** minta **MENTERI KOMUNIKASI DAN MULTIMEDIA** menyatakan status perangkaan Akta Majlis Media Malaysia yang telah dirangka pada tahun 2020.

**JAWAPAN**

Tuan Yang Dipertua,

Laporan daripada Jawatankuasa Pro-Tem berhubung cadangan Penubuhan Majlis Media Malaysia telah diterima dan perlu dinilai dari pelbagai sudut terutamanya dari segi perundangan yang melibatkan cadangan pindaan dan pemansuhan beberapa perundangan sedia ada.

Sehubungan dengan itu, Kementerian ini sedang menilai Laporan Jawatankuasa Pro-Tem serta cadangan RUU Majlis Media Malaysia yang telah disediakan oleh Jawatankuasa Pro-Tem untuk mendapatkan hala tuju terkini berhubung cadangan penubuhan Majlis Media Malaysia ini dengan mengambil kira senario masa kini.

Selanjutnya, Kementerian ini juga perlu memperhalusi cadangan-cadangan pindaan dan pemansuhan Akta-Akta berkaitan yang terletak di bawah bidang kuasa pelbagai Kementerian dan agensi dengan mengadakan sesi libat urus terlebih dahulu sebelum RUU yang berkaitan dapat dimuktamadkan.

Pertimbangan lebih mendalam mengenai perkara ini adalah penting demi memastikan Majlis Media Malaysia ini jika direalisasikan kelak akan saling melengkapi undang-undang sedia ada di samping mengenal pasti impak pelaksanaannya kepada keselamatan, keharmonian dan kedaulatan negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : YB TUAN HASSAN BIN ABDUL KARIM  
( PASIR GUDANG )**

**TARIKH : 15 MAC 2022 (SELASA)**

**SOALAN NO. 54**

**TUAN HASSAN BIN ABDUL KARIM [ PASIR GUDANG ]** minta **MENTERI PENGANGKUTAN** menyatakan apakah usaha Kerajaan Persekutuan untuk membantu menaikkan taraf Pelabuhan Johor di Pasir Gudang menjadi sebuah pelabuhan bertaraf global seperti Pelabuhan Singapura.

## **JAWAPAN**

**Tuan Yang di-Pertua,**

1. Lembaga Pelabuhan Johor (LPJ) ditubuhkan pada 1 Januari 1975 di bawah Akta Lembaga-Lembaga Pelabuhan 1963 (Akta 488) untuk mengendalikan Pelabuhan Johor (Pasir Gudang). Sejajar dengan Dasar Penswastaan Negara, Pelabuhan Johor telah diswastakan kepada pengendali berlesen iaitu Johor Port Berhad (JPB) pada tahun 1995.
2. Dalam hal ini, Kementerian Pengangkutan sentiasa prihatin terhadap perkembangan pelabuhan-pelabuhan di Malaysia, termasuklah Pelabuhan Johor (Pasir Gudang), di mana antara salah satunya adalah dengan pemantauan berterusan Pelan Pembangunan Pelabuhan yang telah diluluskan.
3. Antara inisiatif yang telah dilaksanakan untuk membangunkan Pelabuhan Johor (Pasir Gudang), pada tahun 2012 hingga 2019, sebanyak RM611 juta telah dilaburkan bagi tujuan penambahbaikan fasiliti dan infrastruktur pelabuhan. Seterusnya, sejumlah RM574 juta telah diperuntukkan untuk penambahan fasiliti serta peralatan jentera kren di pelabuhan pada tahun 2020 hingga 2024. Antaranya adalah dengan penambahbaikan Terminal Kontena iaitu menambah baik fasiliti rel kereta api dan kren pindah di lapangan kontena, kerja-kerja pemuliharaan di kawasan kontena, serta penambahan *prime mover* di pelabuhan.
4. Selain itu, Terminal Pelbagai Guna dirancang untuk ditambah baik dengan menambah baik Jeti Pukal Cecair dan pengendalian pukal cecair serta pukal kering, dan menyelenggara Jeti *Edible*. Tambahan pula, sistem pelabuhan dirancang untuk ditambah baik dengan menambah baik sistem *Multipurpose Terminal* (MPTS), sistem *Resources Planning* (ERP), dan sistem sokongan pelabuhan serta mengintegrasikan sistem *eGateway*.
5. Selain daripada itu, dengan permintaan yang kian meningkat dan mencabar, pelaburan dalam aspek pendigitalan yang telah dan bakal

dilaksanakan diyakini dapat memastikan pelabuhan ini terus relevan bersaing dengan pelabuhan-pelabuhan lain. Pihak Kementerian dan Lembaga Pelabuhan Johor juga sentiasa menyokong usaha dan inisiatif oleh JPB untuk memastikan tahap kecekapan pelabuhan dapat dijaga dan terus relevan di mata dunia.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA 2022, PENGGAL KELIMA,  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : TUAN TEH KOK LIM [TAIPING]**

**TARIKH : 15 MAC 2022 (ISNIN)**

**SOALAN**

**TUAN TEH KOK LIM [TAIPING]** minta **MENTERI KOMUNIKASI DAN MULTIMEDIA** menyatakan peratusan liputan 4G di seluruh kawasan negeri Perak dan peratusan rakyat negeri Perak yang sedang menikmati perkhidmatan rangkaian 4G.

**JAWAPAN**

Tuan Yang Dipertua,

Peratusan liputan 4G di kawasan berpenduduk di Perak telah meningkat kepada 96.66% pada suku keempat 2021. Setelah kesemua inisiatif JENDELA Fasa 1 siap kelak, liputan 4G di kawasan berpenduduk di Perak dijangka akan meningkat kepada 97.65% menjelang penghujung tahun 2022. Usaha penambahbaikan rangkaian akan diteruskan di kawasan-kawasan yang telah mempunyai liputan untuk memberikan kualiti pengalaman yang lebih baik kepada pengguna.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : Y.B. DATO' WIRA HAJI AMIRUDDIN BIN  
HAJI HAMZAH  
[KUBANG PASU]**

**TARIKH : 15 MAC 2022 (SELASA)**

**SOALAN**

**DATO' WIRA HAJI AMIRUDDIN BIN HAJI HAMZAH [ KUBANG PASU ]** minta **MENTERI KEWANGAN** menyatakan berapa jumlah komitmen hutang negara sehingga akhir tahun 2022 dan pecahannya mengikut kategori hutang langsung Kerajaan, komitmen jaminan, 1MDB, pelbagai pakej rangsangan COVID-19 dan liabiliti lain. Nyatakan peratusan hutang kepada KDNK.

**JAWAPAN**

**Tan Sri Yang di-Pertua,**

Sehingga akhir 2021, hutang Kerajaan Persekutuan mencatat RM979.8 bilion atau 63.4% berbanding KDNK. Daripada jumlah ini, hutang statutori berjumlah RM922.5 bilion atau 59.7% berbanding KDNK dan masih dalam lingkungan had statutori 65% daripada KDNK yang telah dinaikkan pada Oktober lalu.

Selain daripada hutang Kerajaan Persekutuan, Kerajaan juga menanggung liabiliti lain seperti berikut:

- Pertama, komitmen jaminan iaitu hutang-hutang syarikat berkaitan Kerajaan yang mendapat jaminan Kerajaan serta diberi peruntukan untuk pelaksanaan pelbagai projek infrastruktur dan utiliti awam yang berjumlah RM197.3 bilion;
- Kedua, hutang syarikat 1Malaysia Development Berhad (atau 1MDB) yang dianggarkan kira-kira RM32 bilion; dan
- Ketiga, liabiliti kewangan lain meliputi projek kerjasama awam swasta (atau PPP) termasuk pajakan serta projek di bawah inisiatif pembiayaan swasta (atau PFI) dan PBLT Sdn. Bhd. yang dianggarkan berjumlah RM151.1 bilion.

Secara keseluruhannya, kedudukan pendedahan hutang dan liabiliti Kerajaan pada akhir 2021 dianggarkan berjumlah RM1.36 trilion atau 88.1% berbanding KDNK.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : Y.B. PUAN ISNARAISAH MUNIRAH BT  
MAJILIS @ FAKHARUDY  
[KOTA BELUD]**

**TARIKH : 15 MAC 2022 (SELASA)**

**SOALAN**

**PUAN ISNARAISAH MUNIRAH BT MAJILIS @ FAKHARUDY [ KOTA BELUD ]** minta **MENTERI KEWANGAN** menyatakan jumlah hasil yang dikutip oleh Persekutuan dari Sabah di bawah Jadual 10, Perkara 112C Perlembagaan Persekutuan bagi tahun 1970 hingga 1980, tahun 1981 hingga 1990, tahun 1991 hingga 2000, tahun 2001 hingga 2010 dan tahun 2011 hingga 2020.

**JAWAPAN**

**Tan Sri Yang Di Pertua,**

Formula yang diperuntukkan di dalam Perkara 112C Perlembagaan Persekutuan (PP) dibaca bersama subseksyen 2(1), Bahagian IV, Jadual Kesepuluh, Perlembagaan Persekutuan tidak lagi terpakai. Ini adalah kerana kajian semula ke atas Pemberian Khas telahpun dijalankan dan dipersetujui bersama di bawah Perkara 112D Perlembagaan Persekutuan dalam tempoh 1969 hingga 1973 serta kadar Pemberian Khas tersebut berkuat kuasa sehingga kini.

Kini, Kerajaan Persekutuan dan Kerajaan Negeri Sabah dalam proses mengkaji semula dan menambah baik Pemberian Khas selaras dengan Perkara 112D Perlembagaan Persekutuan tersebut. Pengumuman berkenaan perkara ini akan diumumkan kelak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DATUK MOHD. AZIS BIN JAMMAN  
[ SEPANGGAR ]**

**TARIKH : 15 MAC 2022 (SELASA)**

**SOALAN**

**DATUK MOHD. AZIS BIN JAMMAN [ SEPANGGAR ]** minta **MENTERI KANAN PENDIDIKAN** menyatakan jumlah sekolah di Sabah yang telah diselenggara bagi tahun 2018 hingga 2021, berapa peruntukan yang disediakan dan berapa jumlah sebenar yang dibelanjakan serta peruntukan bagi tahun ini melibatkan berapa buah Parlimen.

**JAWAPAN**

**Tuan Yang di-Pertua,**

Untuk makluman Ahli Yang Berhormat, Kementerian Pendidikan Malaysia (KPM) telah menyalurkan peruntukan berjumlah RM118.1 juta bagi menyelenggara sekolah-sekolah di negeri Sabah dari tahun 2018 hingga 2021 dengan pecahan seperti berikut:

- i. sebanyak 396 buah sekolah telah diselenggara pada tahun 2018 dengan peruntukan berjumlah RM22.9 juta dan perbelanjaan sebenar bagi tahun tersebut adalah sebanyak RM21.8 juta;
- ii. sebanyak 385 buah sekolah telah diselenggara pada tahun 2019 dengan peruntukan berjumlah RM40.6 juta dan perbelanjaan sebenar bagi tahun tersebut adalah sebanyak RM40.5 juta;
- iii. sebanyak 270 buah sekolah telah diselenggara pada tahun 2020 dengan peruntukan berjumlah RM29 juta dan perbelanjaan sebenar bagi tahun tersebut adalah sebanyak RM28.5 juta; dan
- iv. sebanyak 423 buah sekolah telah diselenggara pada tahun 2021 dengan peruntukan berjumlah RM25.6 juta dan perbelanjaan sebenar bagi tahun tersebut adalah sebanyak RM24.1 juta.

Bagi tahun 2022, KPM telah menyalurkan peruntukan berjumlah RM16.1 juta untuk menyelenggara 106 buah sekolah di 23 buah parlimen di negeri Sabah. Sebarang pertambahan peruntukan akan dipertimbangkan berdasarkan kemampuan kewangan dan prestasi berbelanja oleh Jabatan Pendidikan Negeri (JPN).

Agihan peruntukan bagi penyelenggaraan, ubah suai dan naik taraf sekolah berstatus sekolah kerajaan diagihkan kepada JPN berdasarkan permohonan dan susunan keutamaan yang disyorkan oleh JPN atau Jabatan Kerja Raya (JKR). Agihan peruntukan bagi penyelenggaraan, ubah suai dan naik taraf sekolah berstatus sekolah bantuan kerajaan (SBK) pula akan dipertimbangkan berdasarkan permohonan yang akan dikemukakan kepada KPM oleh Lembaga Pengelola Sekolah (LPS).

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : PUAN HAJAH NATRAH BINTI ISMAIL  
[ SEKIJANG ]**

**TARIKH : 15 MAC 2022 (SELASA)**

**SOALAN**

**PUAN HAJAH NATRAH BINTI ISMAIL [ SEKIJANG ]** minta **MENTERI PELANCONGAN, SENI DAN BUDAYA** menyatakan jumlah kawasan tumpuan pelancongan utama yang sedia ada di negeri Johor dan apakah ketersediaan pihak Kementerian dalam meneroka kawasan yang mempunyai potensi pelancangan yang baharu di negeri Johor.

**JAWAPAN**

**Tuan Yang di-Pertua,**

1. Negeri Johor memiliki banyak destinasi pelancongan menarik pelbagai kategori seperti pantai, pulau, taman tema, pusat perangan atau *resort* yang menarik, taman negara, air terjun, tempat membeli belah dan sebagainya. Terdapat lebih daripada 53 tempat-tempat menarik yang popular dan menjadi tumpuan pelancong yang boleh di terokai dan lawati.
2. Antara destinasi utama yang menjadi pilihan dan dilawati pelancong di negeri Johor adalah Desaru, Pantai Tanjung Balau, Teluk Gorek, Pantai Minyak Beku, Sedili Besar, Pulau Rawa, Taman Negara Endau-Rompin, Legoland, Danga Bay dan Pantai Stulang Laut.
3. Menerusi Pelan Ekopelancongan Kebangsaan 2.0 (2020-2030), Kementerian Pelancongan, Seni dan Budaya (MOTAC) telah mengenalpasti 60 kluster ekopelancongan di seluruh negara yang berpotensi untuk dibangunkan dan dipromosikan secara bersepadu. Bagi negeri Johor, terdapat lima (5) kluster ekopelancongan yang telah dikenalpasti iaitu:
  - (i) RAMSAR Johor – Gunung Pulai – Sungai Johor;
  - (ii) Kota Tinggi – Sungai Johor – Desaru - Sedili;
  - (iii) Mersing – Sultan Iskandar Marine Park;
  - (iv) Kluang – Endau Rompin – Segamat;
  - (v) Tangkak – Sagil – Gunung Ledang; dan Batu Pahat – Parit Jawa – Muar
4. Pembangunan secara kluster boleh memastikan destinasi-destinasi ekopelancongan dibangunkan secara lestari menerusi aktiviti-aktiviti berasaskan komuniti (*Community-Based Tourism* - CBT).
5. MOTAC sentiasa dan akan terus melaksanakan usaha-usaha promosi produk-produk pelancongan di seluruh negara. Khusus bagi negeri Johor, pada tahun 2021, MOTAC menerusi agensinya iaitu Tourism Malaysia telah menjalankan beberapa acara dan program

## SOALAN NO : 59

promosi dalam usaha untuk mempertingkatkan kehadiran pelancong ke negeri tersebut. Antara program yang dijalankan dengan kerjasama agensi-agensi di bawah Kerajaan Negeri Johor dan agensi-agensi Kerajaan Persekutuan yang lain termasuklah:

- (i) Program Jelajah Johor 'Cuti-Cuti Malaysia' BMX Ungkal 1.0 2021 pada melibatkan penjelajahan ke seluruh daerah di negeri Johor (Laluan BMX) Pontian – Batu Pahat – Muar – Tangkak – Segamat – Kluang – Mersing – Kota Tinggi (Desaru Coast) – Johor Bahru – Kulai – Pontian;
- (ii) Program Ekspresi Media: *Southern Hidden Gem* Selatan dengan kerjasama Pejabat Daerah Muar serta melibatkan 17 wakil media bertujuan mempromosikan produk-produk baru dan sedia ada pelancongan negeri Johor;
- (iii) Jelajah Jom Jalan Homestay Johor bagi mengemaskini produk-produk yang ditawarkan oleh pengusaha inap desa di negeri Johor dan promosi di media sosial;
- (iv) Jelajah Homestay Johor 'Marilah Pulang Ke Kampung' yang melibatkan pengusaha-pengusaha inap desa di bawah Program Pengalaman Homestay Malaysia di negeri Johor; dan
- (v) Festival Permainan Tradisional Negeri Johor 2021 pada bulan Disember 2021 dengan kerjasama Tourism Johor dan Yayasan Warisan Johor.

6. MOTAC dan agensi di bawahnya akan terus memberi tumpuan dalam penambahbaikan kepada produk pelancongan sedia ada serta menerokai produk-produk pelancongan baharu yang berpotensi di negeri Johor dan seluruh negara.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : TUAN TEH KOK LIM [ TAIPING ]**

**TARIKH : 15 MAC 2022 (SELASA)**

**SOALAN**

**TUAN TEH KOK LIM [ TAIPING ]** minta **MENTERI PELANCONGAN, SENI DAN BUDAYA** menyatakan rancangan Kementerian untuk menghidupkan semula industri pelancongan pasca COVID-19 dan peruntukan yang Kementerian akan salurkan pada tahun 2022 untuk membantu pemain industri yang terkesan dan terjejas secara terperinci jumlah peruntukan yang disalurkan serta jumlah syarikat yang menerima bantuan.



**JAWAPAN**

**Tuan Yang di-Pertua,**

1. Seperti Ahli Yang Berhormat sedia maklum, Kementerian Pelancongan, Seni dan Budaya (MOTAC) sentiasa dan terus giat melaksanakan pelbagai inisiatif dalam memulih dan merancakkan kembali industri pelancongan negara.

2. Antara inisiatif yang sedang dilaksanakan adalah merancakkan Pelancongan Domestik menerusi:

- (i) pemberian baucar diskaun/rebat sebanyak RM20 juta bertujuan meningkatkan promosi pelancongan Malaysia dan juga kuasa membeli (*purchasing power*) pengguna ke atas produk-produk pelancongan, seni dan budaya; dan
- (ii) pemberian dana sokongan sebanyak RM5 juta bagi aktiviti promosi dan penggiat pelancongan dalam bentuk bantuan kewangan kepada persatuan/ kelab/ syarikat/ agensi pelancongan.

3. Walaupun sempadan antarabangsa negara belum dibuka sepenuhnya, MOTAC telah berusaha untuk memulakan pelancongan antarabangsa melalui pelaksanaan Projek Rintis Gelembung Pelancongan Antarabangsa Langkawi (LITB) bermula 15 November 2021. Usaha ini merupakan ujian rintis atau *pilot test* ke atas kesediaan keseluruhan ekosistem industri pelancongan terutamanya penggiat-penggiat industri dan agensi-agensi Kerajaan dalam menerapkan norma baharu serta membuka industri pelancongan kepada pelancong antarabangsa secara berperingkat dan selamat.

4. Pada tahun 2020 dan 2021, MOTAC telah memperuntukkan sebanyak RM61juta bagi penyaluran bantuan kewangan kepada lebih 20,000 pengusaha pelancongan yang berdaftar dengan MOTAC iaitu syarikat / agensi pelancongan (TOBTAB), ejen Syarikat Malaysia My Second Home (MM2H), pengusaha inap desa, pemandu pelancong dan pengusaha spa serta pusat urut kaki di seluruh negara.

## SOALAN NO : 60

5. Untuk tahun 2022 pula, Kerajaan akan terus menyalurkan bantuan-bantuan menerusi Bajet 2022 bagi membantu kelangsungan syarikat-syarikat pelancongan yang terjejas, antaranya:

- (i) RM600juta bagi Skim Pembiayaan Pelancongan PENJANA yang diselaraskan oleh Bank Negara Malaysia dengan kerjasama 12 institusi bank;
- (ii) RM600juta untuk inisiatif pelaksanaan Program Subsidi Upah yang akan memanfaatkan lebih 26,000 majikan dan 330,000 pekerja;
- (iii) RM85juta bagi Bantuan Khas Tunai kepada pengusaha pelancongan yang berdaftar dengan MOTAC. Bantuan ini akan memberi manfaat sehingga 10,000 orang pemandu pelancong, lebih 5,000 TOBTAB, 400 ejen syarikat MM2H, 500 pengusaha Spa dan Pusat Urutan Kaki, 3,100 pengusaha inap desa berdaftar dengan MOTAC, 6,000 usahawan kraf dan komuniti Orang Asli Mah Meri;
- (iv) RM30juta pemberian geran padanan bagi tujuan pembaikan hotel bajet serta geran pembaikan kepada lebih 3,300 pengusaha inap desa yang berdaftar dengan MOTAC;
- (v) pelanjutan beberapa galakan cukai termasuk pengecualian cukai pendapatan kepada penganjur aktiviti kesenian dan kebudayaan serta pertandingan sukan dan rekreasi bertaraf antarabangsa sehingga tahun taksiran 2025; dan
- (vi) pelanjutan pengecualian cukai pelancongan sehingga 31 Disember 2022.

## **SOALAN NO : 60**

6. Selain itu, MOTAC turut melanjutkan tempoh kelonggaran hal-hal berkaitan fi lesen dan kompaun kepada TOBTAB dan pemandu pelancong berlesen sehingga Jun 2022 bagi membantu penggiat industri pelancongan yang terkesan daripada penularan COVID-19, antaranya:

- (i) kelonggaran berkaitan kompaun;
- (ii) pengecualian fi kepada TOBTAB dan pemandu pelancong; dan
- (iii) kelonggaran syarat lesen kepada TOBTAB.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : Y.B. TUAN CHAN MING KAI  
[ALOR SETAR]**

**TARIKH : 15 MAC 2022 (SELASA)**

**SOALAN**

**TUAN CHAN MING KAI [ ALOR SETAR ]** minta **MENTERI KEWANGAN** menyatakan berapa jumlah usahawan peniaga e-dagang yang dianggarkan mengelak membayar cukai di mana pendapatan kasar telah mencecah RM800 bilion serta apa tindakan diambil oleh LHDN untuk mengenal pasti golongan ini.

**JAWAPAN**

**Tan Sri Yang di-Pertua,**

Untuk makluman Yang Berhormat, jumlah usahawan peniaga e-dagang yang dianggarkan mengelak membayar cukai tidak dapat ditentukan. Ini adalah kerana individu yang memperoleh pendapatan daripada ekonomi gig melaporkan pendapatan kepada Lembaga Hasil Dalam Negeri Malaysia (LHDNM) melalui Borang Nyata Cukai Pendapatan (BNCP) sama seperti individu yang menjalankan perniagaan.

Pengelakan cukai tidak tertumpu kepada sesuatu sektor tetapi ianya berlaku di semua sektor. Namun, inisiatif berterusan sentiasa dilaksanakan oleh LHDNM bagi mengurangkan ketirisan cukai. Ini termasuklah ke atas segmen e-Dagang yang mana tindakan berikut dilaksanakan:

- Pertama, memberi penumpuan kepada pendidikan cukai dan kesedaran cukai kepada mereka yang terlibat dengan e-Dagang melalui pendekatan *nudging, dengan izin*, melalui mesej percukaian di ruangan komen media sosial. Ini bagi mempengaruhi gelagat pembayar cukai yang menjalankan aktiviti e-Dagang dan mewujudkan kesedaran cukai ke atas pembayar cukai (iaitu pemilik laman sosial) secara khusus dan di kalangan masyarakat (atau pengikut) secara umumnya;
- Kedua, melaksanakan aktiviti seperti penganjuran seminar, penerbitan risalah percukaian dan hebahan oleh tetamu jemputan LHDNM di radio arus perdana.
- Ketiga, melakukan pemantauan secara rutin ke atas laman web dan media sosial serta menganalisis data pemantauan harian bagi mengenalpasti model perniagaan baharu, aktiviti e-Dagang atau sebarang isu percukaian berisiko;
- Keempat, menumpukan kepada tindakan penguatkuasaan yang lebih berfokus bertujuan untuk mendidik serta meningkatkan kesedaran mengenai kepentingan percukaian;

- Kelima, memberi tumpuan kepada pemilihan kes transaksi e-dagang yang berisiko melibatkan perniagaan secara online di laman web dan media sosial, transaksi perniagaan yang menggunakan *electronic data interchange* serta aktiviti *influencer*, dan
- Keenam, mengadakan kerjasama dan sesi libat urus dengan agensi kerajaan/swasta yang terlibat secara langsung dengan aktiviti e-Dagang bagi meningkatkan pematuhan secara sukarela oleh peniaga e-Dagang.

Melalui Rancangan Malaysia Ke 12, Kerajaan memberi tumpuan kepada ekonomi gig yang melibatkan perkhidmatan menggunakan platform digital. Walaupun kebanyakan pembayar cukai yang terlibat dalam sektor ini terdiri dari kategori pendapatan B40 dan M40, mesej percukaian terus diberikan secara konsisten kepada masyarakat untuk memastikan pematuhan cukai ditingkatkan selaras dengan perkembangan sektor ini. Ianya sejajar dengan pihak Kerajaan yang mensasarkan sektor ini sebagai sumber penting kepada pertumbuhan ekonomi negara dan membuka peluang yang lebih besar kepada rakyat untuk menambah pendapatan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : Y.B. TUAN RAMKARPAL SINGH A/L  
KARPAL SINGH  
[BUKIT GELUGOR]**

**TARIKH : 15 MAC 2022 (SELASA)**

**SOALAN**

**TUAN RAMKARPAL SINGH A/L KARPAL SINGH [ BUKIT GELUGOR ]** minta **MENTERI KEWANGAN** menyatakan sama ada Menteri Kewangan menyokong atau bersetuju dengan keputusan Menteri Besar Kedah bahawa Kerajaan Negeri Kedah tidak akan lagi meluluskan lesen perjudian kepada mana-mana premis perjudian di negeri tersebut walaupun pada hakikatnya Kerajaan negeri tidak mempunyai kuasa untuk membuat keputusan sedemikian.

**JAWAPAN**

**Tan Sri Yang di-Pertua,**

Kementerian Kewangan telah menerima secara rasmi permohonan daripada Kerajaan Negeri Kedah untuk memberhentikan pengeluaran lesen perjudian bagi seluruh negeri Kedah. Perkara ini masih lagi dalam peringkat penelitian Kementerian ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : Y.B. TUAN NOOR AMIN BIN AHMAD  
[KANGAR]**

**TARIKH : 15 MAC 2022 (SELASA)**

**SOALAN**

**TUAN NOOR AMIN BIN AHMAD [ KANGAR ]** minta **MENTERI KEWANGAN** menyatakan jumlah, sumber dan tujuan hutang Kerajaan sejak 2013 sehingga kini. Bilakah tempoh pembayaran balik perlu diselesaikan untuk semua hutang ini.



**JAWAPAN**

**Tan Sri Yang Di Pertua,**

Sejajar dengan peraturan kewangan yang termaktub di bawah Akta Pinjaman (Tempatan) 1959, Akta Pendanaan Kerajaan 1983 dan Akta Pinjaman Luar Negeri 1963, pinjaman hanya dibuat untuk membiayai semula hutang yang matang dan perbelanjaan pembangunan. Sumber pinjaman Kerajaan Persekutuan adalah melalui terbitan instrumen hutang dalam negeri dan luar pesisir. Instrumen hutang dalam negeri merangkumi Sekuriti Kerajaan Malaysia (MGS), Terbitan Pelaburan Kerajaan Malaysia (MGII), Bil Perbendaharaan Islam Malaysia (MITB) dan Bil Perbendaharaan Malaysia (MTB), manakala instrumen pinjaman luar pesisir pula merupakan terbitan sukuk/bon dalam denominasi matawang asing seperti terbitan sukuk global iaitu dalam matawang USD dan bon Samurai dalam yen. Pada 2020, menerusi Akta Langkah-Langkah Sementara bagi Pembiayaan Kerajaan (Penyakit Koronavirus 2019 (COVID-19)) 2020, Kerajaan juga dibenarkan untuk membuat pinjaman tambahan bagi menampung perbelanjaan pakej rangsangan dan pemulihan ekonomi di bawah Kumpulan Wang COVID-19 demi memastikan kesejahteraan hidup rakyat, kelangsungan perniagaan dan ekonomi kekal berdaya tahan dalam tempoh krisis pandemik COVID-19.

Untuk makluman Tuan Yang di-Pertua, semasa pra-krisis COVID-19, jumlah hutang Kerajaan Persekutuan mencatat RM539.9 bilion atau 53.0% kepada KDNK pada 2013 dan meningkat kepada RM793.0 bilion atau 52.4% kepada KDNK pada 2019. Manakala, nisbah hutang statutori yang merangkumi instrumen Sekuriti Kerajaan Malaysia (MGS), Terbitan Pelaburan Kerajaan Malaysia (MGII) dan Bil Perbendaharaan Islam Malaysia (MITB) mencatat 47.1% kepada KDNK pada 2013 dan 48.6% pada 2019, tidak melebihi had 55% kepada KDNK yang ditetapkan ketika itu.

Walau bagaimanapun, berikutan keperluan untuk membiayai pakej rangsangan ekonomi untuk mengurangkan impak krisis pandemik COVID-19 yang melanda negara, hutang Kerajaan Persekutuan telah meningkat kepada RM879.6 bilion atau 62.1% kepada KDNK pada 2020

dan RM979.8 bilion atau 63.4% pada 2021. Nisbah hutang statutori juga telah meningkat kepada 57.9% kepada KDNK pada 2020 dan 59.7% pada 2021, namun masih tidak melebihi had statutori yang ditetapkan dalam Akta Langkah-Langkah Sementara bagi Pembiayaan Kerajaan (Penyakit Koronavirus 2019 (COVID-19)) 2020.

Trend ini bukan sahaja dialami oleh Malaysia, malah kesemua kerajaan di dunia turut merekodkan paras hutang yang tinggi sebagai usaha untuk meneruskan sokongan fiskal dan pemulihan semula ekonomi sesebuah negara. Berdasarkan laporan IMF Fiscal Monitor yang diterbitkan pada Oktober 2021, hutang kerajaan di seluruh dunia merekodkan peningkatan hutang mencecah hampir 100% kepada KDNK dunia pada 2020 dan dijangka kekal tinggi pada 2021 dan 2022.

Dari aspek profil kematangan hutang, purata wajaran tempoh matang meningkat kepada 8.7 tahun setelah mengambil kira keseluruhan program pinjaman untuk tahun 2021. Sehingga akhir 2021, sebanyak 43.4% daripada jumlah hutang akan matang dalam tempoh 5 tahun, 25.4% hutang akan matang dalam tempoh 6 hingga 10 tahun, manakala 31.2% akan matang selepas 10 tahun.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DATO' SERI UTAMA HAJI MUKHRIZ BIN  
TUN DR. MAHATHIR [ JERLUN ]**

**TARIKH : 15 MAC 2022 (SELASA)**

**SOALAN**

**DATO' SERI UTAMA HAJI MUKHRIZ BIN TUN DR. MAHATHIR [ JERLUN ]** minta **MENTERI PERTANIAN DAN INDUSTRI MAKANAN** menyatakan strategi jangka panjang untuk memastikan bekalan ayam dan daging mencukupi, dijual pada harga yang berpatutan sambil menguntungkan pengusaha tempatan. Adakah Kementerian berpandangan bahawa pengimportan ayam, daging dan dedak adalah penyelesaian jangka panjang yang akan menguntungkan negara.

**JAWAPAN**

**Tuan Yang di-Pertua,**

Untuk makluman Ahli Yang Berhormat, untuk memastikan bekalan ayam dan daging mencukupi, dijual pada harga yang berpatutan dan penternak masih mendapat keuntungan, Kerajaan telah menggariskan lima (5) strategi jangka panjang di bawah Dasar Agromakanan Negara 2021 – 2030 (DAN 2.0) iaitu:

- (i) Meningkatkan pertumbuhan dan kemampanan dalam industri ternakan ayam/itik;
- (ii) Memudahkan akses pasaran bagi industri ruminan kepada usahawan baharu;
- (iii) Meningkatkan bilangan ternakan ruminan;
- (iv) Melaksanakan mitigasi dan kawalan kematian serta kerugian akibat penyakit; dan
- (v) Mengurangkan kebergantungan import bahan makanan ternakan.

Bagi mencapai strategi tersebut, Kerajaan melaksanakan inisiatif seperti berikut:

- (i) Program Peningkatan Ruminan (PPR) - Merupakan insentif berbentuk geran padanan kepada penternak lembu integrasi komersil menerusi konsep kerjasama pintar 50% kerajaan: 50% penternak. Melalui program ini, disasarkan sebanyak 13 buah syarikat integrasi perladangan dan seramai 65 orang penternak akan menerima manfaat dengan jumlah peruntukan keseluruhan sebanyak RM40 juta;
- (ii) Skim Rezeki Ternakan Ruminan dan Unggas - Bertujuan untuk membantu penternak kecil dan B40 menambahkan sumber pendapatan menerusi pakej bantuan bagi perolehan ternakan,

makanan ternakan dan input peralatan ladang dengan jumlah peruntukan keseluruhan sebanyak RM30 juta;

- (iii) Program Agropreneur Muda - Bertujuan untuk membantu dan menggalakkan penglibatan golongan muda dalam bidang penternakan menerusi Geran Agropreneur Muda dalam bentuk barangan bernilai RM20,000 setiap individu;
- (iv) Program Penanaman Jagung Bijian Negara - Bertujuan untuk mengurangkan kebergantungan kepada sumber jagung import sebanyak 30% secara berfasa. Projek berkeluasan 80,000 hektar ini dijangka dapat mengeluarkan jagung bijian tempatan sebanyak 1.44 juta tan metrik menjelang tahun 2032;
- (v) Menjalankan aktiviti penyelidikan bagi menghasilkan bahan mentah gantian dari sumber tempatan - Produk premium yang berasaskan isirung kelapa sawit (PKC) ini adalah hasil kajian bersama MARDI, Malaysian Palm Oil Board (MPOB) dan SIME Darby Plantation. Ianya sesuai digunakan dalam formulasi makanan unggas dan boleh menggantikan jagung bijian dan *soybean meal* sebanyak 30 hingga 45%; dan
- (vi) Pengukuhan perkhidmatan Pusat Pengembangan Veterinar (VetEC), Pusat Pengumpulan Industri Tenusu (PPIT) dan Pejabat Veterinar Daerah - Memperkukuhkan penyampaian perkhidmatan pengembangan veterinar di lapangan menerusi Pusat Pengembangan Veterinar (VetEC), Pusat Pengumpulan Industri Tenusu (PPIT) dan Pejabat Veterinar Daerah bagi membantu para penternak untuk meningkatkan produktiviti ternakan dan ladang.

Kebergantungan kepada sumber import bukanlah langkah jangka panjang yang menguntungkan negara. Oleh itu seperti disasarkan dalam DAN 2.0, pengimportan daging lembu/kerbau dikurangkan dengan meningkatkan kadar sara diri (SSL) kepada 50% berbanding 20.7% pada tahun 2020. Pengimportan masih diperlukan bagi memenuhi permintaan pengguna tempatan dari segmen daging kotak dan keratan premium.

Sementara itu, kebenaran bagi pengimportan ayam hanya bersifat sementara sehingga bekalan ayam dalam negara kembali stabil. Ini kesan daripada negara berhadapan dengan kekurangan bekalan ayam sebanyak

8.5% (9,601 tan metrik/ 5.3 juta ekor) sebulan dan mengakibatkan kenaikan harga ayam bulat mencecah sehingga RM10/kg. Oleh itu Kerajaan membenarkan pengimportan ayam bulat dari bulan Disember 2021 hingga Mei 2022. Berdasarkan DAN 2.0, SSL ayam/itik disasarkan sebanyak 140% menjelang tahun 2030 untuk memastikan bekalan ayam kekal mencukupi.

Bagi bahan makanan haiwan ternakan, terutamanya jagung bijian dan *soy bean meals* (SBM) Kerajaan masih perlu mengimport dari luar. Bagi mengurangkan kebergantungan kepada import bahan makanan, negara menyasarkan pengeluaran jagung bijian sebanyak 1.44 juta tan metrik menjelang tahun 2033 yang dijangka dapat memenuhi 30% keperluan negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KELIMA  
PARLIMEN KEEMPAT BELAS 2022**

---

**PERTANYAAN : LISAN**

**DARIPADA : TUAN KHOO POAY TIONG  
[KOTA MELAKA]**

**TARIKH : 15 MAC 2022 (SELASA)**

**SOALAN**

**TUAN KHOO POAY TIONG [ KOTA MELAKA ]** minta **MENTERI  
PERTANIAN DAN INDUSTRI MAKANAN** menyatakan :-

- (a) maklumat mengenai subsidi Kementerian kepada pengeluar ayam untuk tahun 2021 dan 2022, termasuklah jumlah dan jenis subsidi, dan bilangan penerima; dan
- (b) apakah perancangan Kementerian untuk memastikan harga dan bekalan daging ayam kekal stabil untuk tahun ini.

**JAWAPAN**

**Tuan Yang di-Pertua,**

Untuk makluman Ahli Yang Berhormat, Kerajaan bersetuju memberi subsidi sebanyak RM0.60/kg bagi ayam bulat dan RM0.05/biji bagi telur gred A, B dan C bermula dari 5 Februari hingga 5 Jun 2022. Usaha ini dijangka dapat memberi manfaat kepada seramai 2,061 penternak ayam pedaging dan 194 penternak ayam penelur. Jumlah keseluruhan subsidi yang ditanggung oleh Kerajaan ialah sebanyak RM528.52 juta.

Selain itu, Kerajaan menyediakan bantuan kepada penternak menerusi Skim Rezeki Ternak di bawah Rancangan Malaysia Kedua Belas (RMK-12). Program ini bertujuan untuk membantu penternak kecil dan B40 meningkatkan sumber pendapatan melalui pakej bantuan berbentuk perolehan ternakan, makanan ternakan dan input peralatan ladang dengan jumlah peruntukan keseluruhan sebanyak RM30 juta. Sejak diperkenalkan pada tahun 2021, seramai 100 orang penternak ayam telah menerima manfaat daripada program ini dengan nilai bantuan berjumlah RM150 ribu.

Bagi memastikan harga dan bekalan daging ayam kekal stabil untuk tahun ini, Kerajaan telah mengambil langkah-langkah berikut:

- (i) memberi kebenaran mengimport (*approved permit* – AP) kepada 36 buah syarikat untuk mengimport ayam bulat dan keratan ayam dari loji luar negara yang diiktiraf sebanyak sehingga 10,000 tan metrik sebulan bermula dari Disember 2021 hingga Mei 2022;
- (ii) mengurangkan kebergantungan kepada sumber jagung import sebanyak 30% melalui program penanaman jagung bijian dalam negara secara berfasa. Projek berkeluasan 80,000 hektar ini dijangka dapat mengeluarkan jagung bijian tempatan sebanyak 1.44 juta tan metrik menjelang tahun 2032;
- (iii) menjalankan aktiviti penyelidikan menerusi MARDI bagi menghasilkan bahan mentah gantian dari sumber tempatan



seperti “Purafex”. Produk premium yang berasaskan isirung kelapa sawit (PKC) ini adalah hasil kajian bersama pihak Malaysian Palm Oil Board (MPOB) dan SIME Darby Plantation. Ianya sesuai digunakan dalam formulasi makanan unggas dan boleh menggantikan jagung bijian dan *soybean meal* sebanyak 30 hingga 45%; dan

- (iv) menawarkan pinjaman mudah sebanyak RM200 juta kepada penternak melalui Agrobank bagi membantu penternak mengatasi masalah modal pusingan kewangan yang terjejas akibat kenaikan kos pengeluaran.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : TUAN AHMAD TARMIZI BIN SULAIMAN [SIK]**

**TARIKH : 15 MAC 2022 (SELASA)**

**SOALAN**

**TUAN AHMAD TARMIZI BIN SULAIMAN [ SIK ]** minta **MENTERI PERTANIAN DAN INDUSTRI MAKANAN** menyatakan apakah persiapan dan strategi Kementerian bagi mencapai sasaran 'Tahap Sara Diri' (*self sufficient level*) sektor padi iaitu 75% (2025) dan 80% (2030) seperti yang digariskan dalam Dasar Agromakanan Negara 2.0.

**JAWAPAN**

**Tuan Yang di-Pertua,**

Untuk makluman Ahli Yang Berhormat, MAFI menyasarkan untuk mencapai Tahap Sara Diri (SSL) dalam dua (2) dokumen dasar utama iaitu Rancangan Malaysia Kedua Belas (RMKe-12) dan Dasar Agromakanan Negara 2021-2030 (DAN 2.0) masing-masing pada kadar 75% dan 80%. Sehubungan itu, tumpuan MAFI secara khususnya adalah untuk meningkatkan penghasilan padi domestik. Ini adalah penting bagi memperkukuhkan sekuriti bekalan makanan dan tahap sara diri beras negara, lebih-lebih lagi dalam keadaan negara berhadapan dengan pengurangan kawasan bertanam padi saban tahun, pertambahan populasi dan pandemik COVID-19 yang meningkatkan permintaan terhadap beras.

Justeru, antara pendekatan yang diambil oleh MAFI adalah memperkenalkan Program SMART Sawah Berskala Besar atau lebih dikenali sebagai SMART SBB. Program SMART SBB ini bertujuan untuk meningkatkan produktiviti dan pengeluaran padi dan beras negara menerusi pengurusan sawah dan input pertanian yang lebih teratur dan cekap. Selain itu, program ini juga bermatlamat untuk meningkatkan pendapatan pesawah padi melalui kerjasama pintar dengan pemain industri secara langsung menggunakan pendekatan pertanian kontrak (*contract farming*). Secara khususnya, program SMART SBB menyasarkan peningkatan purata hasil padi nasional kepada 7.0 tan metrik sehektar dalam tempoh RMKe-12 berbanding dengan purata hasil semasa sekitar 3.5 hingga 4.3 tan metrik sehektar. Dalam tempoh jangka panjang, program ini menyasarkan kawasan sawah seluas 150,000 hektar semusim atau 300,000 kawasan bertanam setahun untuk dibangunkan dalam program tersebut.

Secara tidak langsung, pengenalan Program SMART SBB ini juga adalah untuk mengurangkan penglibatan orang tengah daripada mengambil peluang dan meraih keuntungan peribadi. Selama ini secara

## SOALAN NO : 67

konvensional, penanam padi dan pembeli padi (pemain industri) ini diasingkan dan urusan jual beli diuruskan oleh orang tengah yang mengambil keuntungan lebih kurang RM110 hingga RM150 per tan metrik. Mengambil kira purata pengeluaran padi nasional sebanyak 2.9 juta tan metrik, industri ini telah kehilangan lebih kurang RM500 juta di tangan orang tengah sahaja di sepanjang rantai nilai. Perkara ini sewajarnya ditangani dengan segera kerana jumlah itu selayaknya adalah milik para pesawah.

Sehubungan itu, MAFI percaya bahawa pelaksanaan program ini akan menyelesaikan beberapa isu yang sering membelenggu para pesawah seperti kenaikan harga baja dan racun, isu pemutuan padi yang tinggi, penggunaan teknologi yang rendah dan sebagainya menerusi pelaburan oleh pihak syarikat-syarikat peneraju yang telah dilantik oleh MAFI. Sehingga kini, sebanyak 19 buah pihak Syarikat Berkaitan Kerajaan (GLC) dan swasta telah dilantik menerusi beberapa penilaian kriteria teknikal dan kewangan yang telah ditetapkan. Ini memandangkan pelaksanaan program oleh sesebuah Syarikat Peneraju memerlukan komitmen kewangan dan teknikal yang kukuh. Antaranya ialah sesebuah Syarikat Peneraju akan menanggung kos penanaman padi sehingga RM3,200 per hektar meliputi pelbagai kos seperti baja atau racun tambahan, kos rawatan tanah, kos pengangkutan dan sebagainya.

Pelaksanaan program pula meliputi tiga buah model utama iaitu model yang melibatkan pihak GLC, model pihak swasta dan yang terkini adalah model Lembaga Zakat Negeri Kedah (LZNK). Model GLC dan swasta akan melibatkan ikatan program menerusi perjanjian dengan para pesawah menerusi Pertubuhan Peladang Kawasan (PPK), koperasi pesawah atau persatuan pesawah. MAFI ingin menekankan di sini bahawa program SMART SBB tidak melibatkan sebarang pertukaran hak milik tanah milik pesawah kepada Syarikat-syarikat Peneraju tersebut walau apa jua keadaan sekalipun.

Manakala bagi model ketiga, LZNK telah melaksanakan model ala SMART SBB yang dikenali sebagai SMART Asnaf Berskala Besar

## **SOALAN NO : 67**

(SABB). Ianya melibatkan sekelompok asnaf di Negeri Kedah yang dipilih sebagai peserta program untuk mengusahakan kawasan sawah seluas 200 hektar. Kesemua kos penanaman padi ditanggung sepenuhnya oleh LZNK di sepanjang rantai nilai dan setelah program tersebut terbukti berjaya meningkatkan pendapatan asnaf terlibat, ianya diluaskan pula kepada kelompok asnaf seterusnya.

Secara tidak langsung, ketiga-tiga model akan membantu mengurangkan bebanan kewangan Kerajaan secara berperingkat khususnya dalam aspek-aspek penyediaan input pertanian, teknologi dan mekanisasi serta penyediaan infrastruktur menerusi pelaburan oleh kesemua Syarikat Peneraju terlibat. Sehingga kini, Kerajaan membelanjakan subsidi input pertanian bersubsidi berjumlah hampir RM1 bilion saban tahun merangkumi hampir 60% daripada kos pengeluaran padi sehektar.

Dalam tempoh terdekat, MAFI menerusi Agrobank buat pertama kalinya akan memperkenalkan insurans agromakanan dan sektor padi dipilih sebagai projek perintis. Sehubungan itu, ianya akan diperkenalkan dan diaplikasikan sepenuhnya dalam program SMART SBB. Ini akan membantu Kerajaan dalam memastikan para pesawah menerima ganti rugi atau pampasan yang setimpal sekiranya berlaku musibah seperti banjir, kemarau ataupun ribut yang menjejaskan pengeluaran padi domestik.

Misi ini tidak mustahil sekiranya kesemua pihak berkepentingan bekerjasama rapat dalam memastikan sasaran-sasaran tersebut mampu dicapai. Peranan Kerajaan Negeri, para pemain industri, Badan Bukan Kerajaan (NGO) dan para pesawah juga penting bagi menjadikan industri padi dan beras negara berdaya saing dan meningkatkan sekuriti bekalan makanan negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DR. MASZLEE BIN MALIK  
[ SIMPANG RENGAM ]**

**TARIKH : 15 MAC 2022 (KHAMIS)**

**SOALAN**

**DR. MASZLEE BIN MALIK [ SIMPANG RENGAM ]** minta **MENTERI KANAN PENDIDIKAN** menyatakan:-

- (a) apakah Kerajaan telah menyediakan pelan pendidikan holistik jangka masa panjang pasca wabak COVID-19 untuk menangani masalah 'Lost Generation' dan 'Lost Learning' merangkumi pendidikan dasar, pendidikan tinggi, TVET dan juga pendidikan pra-sekolah; dan
- (b) apakah Kerajaan juga melibatkan Kementerian-kementerian pelbagai dan juga semua pihak merentasi politik, kepartian dan kepakaran untuk merangka pelan pendidikan holistik jangka masa panjang pasca wabak COVID-19 sepertimana yang telah dititahkan oleh DYMM YDPA pada tahun 2021.

**JAWAPAN**

**Tuan Yang di-Pertua,**

Kementerian Pendidikan Malaysia (KPM) menyedari bahawa pandemik COVID-19 telah memberi kesan kepada sistem persekolahan. Sesi pengajaran dan pembelajaran (PdP) secara bersemuka menjadi lebih singkat apabila sekolah ditutup bagi membendung penularan COVID-19.

Untuk makluman Ahli Yang Berhormat, sekolah telah mula dibuka pada 3 Oktober 2021 secara berfasa setelah ditutup untuk satu tempoh yang panjang. Pembukaan semula sekolah ini membolehkan murid yang telah lama renggang dengan persekitaran persekolahan kembali semula ke sekolah. Pembukaan sekolah secara bersemuka dilaksanakan berdasarkan satu pelan komprehensif bagi memastikan murid dapat kembali belajar di sekolah dalam keadaan selamat. Pelan komprehensif ini turut melibatkan pengoperasian institusi pendidikan lain seperti kolej matrikulasi dan institut pendidikan guru (IPG). Dalam merangka pelan ini, KPM telah mengadakan sesi libat urus yang menyeluruh bagi mendapatkan pandangan dan cadangan daripada semua pihak berkepentingan. Libat urus melibatkan pentadbir sekolah, guru, Persatuan Ibu Bapa dan Guru (PIBG), murid dan kumpulan pakar daripada sektor kesihatan awam, pendidikan, psikologi kanak-kanak dan pediatrik.

KPM juga telah membuat analisis terperinci mengenai amalan terbaik pembukaan semula sekolah di negara-negara lain bagi meneliti pendekatan yang berkesan dalam pengoperasian dan pembukaannya. Pelan ini kemudiannya diperincikan bersama-sama Kementerian Kesihatan Malaysia dan Majlis Keselamatan Negara serta diselarikan dengan Pelan Pemulihan Negara.

KPM telah membuat ketetapan untuk melanjutkan sesi persekolahan tahun 2021 sehingga bulan Mac 2022. Pelanjutan sesi ini membolehkan

pihak sekolah merancang dan melaksanakan aktiviti pemulihan, pengukuhan dan pengayaan secara intensif bagi meningkatkan kesediaan murid untuk mengikuti tahun persekolahan berikutnya.

KPM memberi fokus kepada keperluan murid untuk mengukuhkan pembelajaran dalam tempoh pasca pandemik. Untuk itu, KPM telah memperkenalkan program pemerkasaan pelaksanaan kurikulum iaitu KPMPerkasaKU. Program ini adalah salah satu usaha untuk membantu memperkukuh kemahiran asas literasi dan numerasi serta memperkasa penguasaan murid dalam mata pelajaran lain berdasarkan kurikulum kebangsaan. Program KPMPerkasaKU dilaksanakan dari peringkat sekolah rendah hingga sekolah menengah sebagai *catch-up plan* yang bertujuan untuk:

- i. meningkatkan penguasaan murid bagi kandungan kurikulum tahun semasa secara optimum;
- ii. merapatkan jurang pembelajaran murid yang wujud semasa krisis;
- iii. menyediakan bahan sokongan kurikulum kepada guru bagi melaksanakan pengajaran dan pembelajaran; dan
- iv. memastikan murid bersedia mengikuti kurikulum tahun persekolahan 2022.

Untuk makluman Ahli Yang Berhormat, KPM komited untuk terus memperkasakan pendidikan TVET yang ditawarkan di kolej vokasional (KV), sekolah menengah teknik (SMT) dan juga program vokasional di sekolah menengah harian. Fokus TVET KPM adalah untuk melahirkan modal insan berteraskan kemahiran, kepakaran, pengiktirafan dan pengalaman di industri. Langkah tersebut adalah untuk meningkatkan kebolehpasaran serta mobiliti sebagai pekerja yang memenuhi keperluan industri. KPM komited bagi memastikan program TVET KPM dilaksanakan dengan memenuhi pembangunan latihan yang komprehensif, pensijilan yang diiktiraf oleh pelbagai pihak terutama pihak industri serta pengetahuan yang tinggi dalam bidang yang berkaitan.



KPM juga menyedari pengukuhan pembelajaran pada peringkat lepas menengah amat penting semasa pandemik COVID-19 dan pasca pandemik ini. Sebagai contoh bagi memastikan tiada murid Program Matrikulasi KPM yang tercicir dalam pembelajaran, KPM telah melaksanakan pengajaran dan pembelajaran (PdP) secara hibrid iaitu dalam talian (*online*) dan luar talian (*off-line*) mengikut kesesuaian pensyarah dan murid. Program tersebut juga melaksanakan penjajaran kurikulum berdasarkan hasil pembelajaran untuk memenuhi keperluan mata pelajaran. Di samping itu, pelbagai bahan sokongan bagi mengukuh penguasaan kandungan mata pelajaran disediakan. Murid Program Matrikulasi juga ditaksir secara berterusan mengikut kesesuaian, dan intervensi dilaksanakan mengikut tahap dan keupayaan murid.

Bagi menghadapi cabaran jangka panjang pandemik COVID-19, KPM telah memantapkan kemahiran guru dengan pelbagai kaedah pedagogi terkini yang dilaksanakan di IPG. Kaedah pedagogi ini berfokus kepada pembelajaran bermakna (*deep learning*) iaitu pembelajaran berasaskan projek, perkongsian rakan pembelajaran dan pemanfaatan teknologi digital.

KPM yakin pelan komprehensif yang dirancang dan dilaksanakan membolehkan murid pada semua peringkat dapat mengikuti pendidikan pasca COVID-19 secara berkesan.

Berhubung pertanyaan Ahli Yang Berhormat berkaitan kerjasama KPM dengan pelbagai pihak. KPM sentiasa terbuka untuk menerima sebarang cadangan daripada semua pihak dalam memastikan sistem pendidikan kebangsaan akan terus dapat dioperasikan dengan berkesan dan mencapai matlamat yang dihasratkan. Ini adalah selaras dengan konsep Keluarga Malaysia yang mementingkan aspek keterangkuman, kebersamaan dan kesyukuran.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DATUK WILSON UGAK ANAK KUMBONG  
( HULU RAJANG )**

**TARIKH : 15 MAC 2022 (SELASA)**

**SOALAN**

**DATUK WILSON UGAK ANAK KUMBONG ( HULU RAJANG )** minta **MENTERI TENAGA DAN SUMBER ASLI** menyatakan tindakan pihak Kementerian untuk mengelakkan bencana longgokan sisa-sisa kayu balak hanyut pada tahun 2010 dan 2021 daripada berulang lagi di Batang Baleh, Kapit.

**JAWAPAN**

Tuan Yang di-Pertua,

1. Kerajaan Negeri Sarawak telah menubuhkan satu pasukan petugas khas iaitu *Special Task Force on Floating Debris along Batang Baleh* yang dipengerusikan oleh Setiausaha Tetap, Kementerian Pembangunan Bandar dan Sumber Asli Sarawak bagi menangani isu sisa kayu balak hanyut di Batang Baleh, Kapit. Antara objektif penubuhan pasukan petugas khas tersebut adalah seperti berikut:

- (i) mencari jalan penyelesaian terhadap masalah berkaitan dengan sisa kayu balak hanyut di Batang Baleh;
- (ii) mengemukakan pelan tindakan mengenai sisa kayu hanyut untuk pertimbangan dan kelulusan Mesyuarat Majlis Kerajaan Negeri; dan
- (iii) meningkatkan kerjasama di antara agensi-agensi kerajaan yang terlibat dalam menangani isu ini termasuk daripada pemain industri dan komuniti setempat.

2. Antara tindakan yang diambil oleh pasukan petugas khas tersebut bagi mengelakkan kejadian longgokan sisa kayu balak hanyut daripada berulang adalah seperti berikut:

- (i) menggantung sementara operasi pembalakan salvaj (*salvage logging operation*) di kawasan pembinaan empangan hidro elektrik Baleh;

## SOALAN NO: 69

- (ii) sedang melaksanakan operasi pembersihan sisa kayu di sepanjang Batang Baleh;
- (iii) memasang perangkat sisa kayu atau *log boom*, dengan izin di kawasan yang strategik di Batang Baleh, Sungai Melatai, Sungai Mengiong dan Sungai Entulu;
- (iv) melaksanakan operasi pemantauan secara berkala melalui udara dan darat termasuk penubuhan stesen pemantauan di beberapa lokasi *hotspot*;
- (v) sedang menambah baik *Biomass Removal Plan* (BRP) dengan mengambil kira pengurusan BRP yang lebih komprehensif meliputi pelan operasi pembalakan salvaj, pelupusan biomass dan penentuan zon penampakan;
- (vi) sedang mengemaskini Prosedur Operasi Standard (SOP) agensi-agensi kerajaan di peringkat negeri yang terlibat; dan
- (vii) sedang mengkaji kesesuaian zon penampakan yang akan diwujudkan di kawasan empangan hidroelektrik Batang Baleh.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA 2022, PENGGAL KELIMA,  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : YB PUAN ALICE LAU KIONG YIENG  
[LANANG]**

**TARIKH : 15 MAC 2022 (SELASA)**

**SOALAN**

**PUAN ALICE LAU KIONG YIENG [LANANG]** minta **MENTERI KOMUNIKASI DAN MULTIMEDIA** menyatakan status terkini pelaksanaan 5G secara menyeluruh di Malaysia terutamanya di Sarawak dan apakah anggaran masa yang akan diambil untuk mencapai sasaran menjadi antara peneraju teknologi 5G.

**JAWAPAN**

Tuan Yang Dipertua,

Pelaksanaan rangkaian 5G oleh Digital Nasional Berhad (DNB) sedang berjalan mengikut perancangan. DNB telah mencapai sasaran bagi Fasa 1A pada tahun 2021 iaitu menyiapkan 500 tapak 5G meliputi kawasan sekitar Putrajaya, Cyberjaya dan Kuala Lumpur, dan memulakan akses kepada perkhidmatan rangkaian borong mereka pada 15 Disember 2021 lalu.

Peluasan rangkaian 5G diteruskan dalam Fasa 1B dengan sasaran 3,518 tapak bagi tahun 2022, yang akan melibatkan kawasan Lembah Klang dan bandar-bandar utama di Johor, Melaka, Negeri Sembilan, Perak, Pulau Pinang, Sabah dan Sarawak.

Daripada segi perkhidmatan kepada pengguna, YTL Communications (YTLC) dan Telekom Malaysia (TM) telah mendapatkan akses daripada DNB. Mereka sedang bekerjasama dengan DNB bagi mengoptimumkan kualiti perkhidmatan 5G. YTLC telah membenarkan pelanggan mereka menikmati perkhidmatan 5G. Sehingga 11 Februari 2022, terdapat 2,457 orang pengguna aktif yang direkodkan dan purata kelajuan muat turun perkhidmatan 5G berada pada tahap 588 Mbps manakala bagi pihak TM pula, mereka masih menjalani fasa ujian.

Bagi negeri Sarawak, dianggarkan sejumlah 339 tapak 5G akan dibangunkan pada tahun 2022. Pembangunan ini akan bermula di daerah Kuching terlebih dahulu pada suku kedua 2022 dengan jumlah 227 tapak. Selain itu, pembangunan rangkaian turut akan dilaksanakan di daerah Miri bermula suku ketiga 2022 dengan jumlah 122 tapak.

DNB telah menyasarkan untuk mencapai sehingga 80% kawasan berpenduduk mendapat liputan 5G pada tahun 2024. Pelaksanaan yang meluas ini akan mengurangkan risiko peluasan jurang digital dalam masyarakat. Seterusnya, peluasan liputan melebihi 80% kawasan berpenduduk akan dilaksanakan DNB pada tahun-tahun seterusnya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

---

**PERTANYAAN : JAWAB LISAN**

**DARIPADA : YB TUAN WONG HON WAI  
[ BUKIT BENDERA ]**

**TARIKH : 15 MAC 2022 (SELASA)**

**SOALAN**

**Tuan Wong Hon Wai [ Bukit Bendera ]** minta **MENTERI PEMBANGUNAN WANITA, KELUARGA DAN MASYARAKAT** menyatakan perancangan Kerajaan dari segi dasar ekonomi untuk mempertingkatkan sekuriti persaraan (*retirement security*) untuk menghadapi keadaan lebih ramai warga emas di negara kita.

**JAWAPAN**

Tuan Yang di-Pertua,

Malaysia dijangka mencapai status negara tua menjelang tahun 2030 apabila 15.3% daripada populasi negara mencapai umur 60 tahun dan ke atas. Dalam hubungan ini, usaha bersepadu sedang diambil untuk mempertingkatkan penjagaan, perlindungan dan sokongan bagi membolehkan warga emas menjadi anggota masyarakat yang aktif. Justeru itu, kerajaan telah membuat perancangan dan mengambil langkah sewajarnya bagi menghadapi perkara ini. Antara inisiatif oleh Kementerian Pembangunan Wanita, Keluarga dan Masyarakat (KPWKM) yang telah dilakukan bagi menghadapi situasi ini adalah pengkajian semula Dasar dan Pelan Tindakan Warga Emas Negara dan juga pelaksanaan satu kajian berkenaan pewujudan satu akta khusus bagi warga emas.

Selain daripada itu, KPWKM juga melaksanakan beberapa kajian lain seperti “Kajian Diagnostik bagi Membentuk Model Penjagaan Warga Emas Jangka Masa Panjang yang Bersepadu dan Mampan di Malaysia” dan “Kajian *Preparation Towards an Aged Nation by 2020 – Age-friendly City* (Taiping)”. Hasil daripada semua kajian ini akan diteliti dan diambil kira dalam persediaan negara ke arah menjadi negara tua termasuk dari segi penyediaan bantuan kewangan kepada warga emas.

Berhubung dengan penyediaan skim insurans kepada warga emas, ini adalah bidang tanggungjawab Kementerian Kewangan (MOF). Selain itu, menurut Unit Perancang Ekonomi (EPU) JPM, sistem pencen dan perlindungan persaraan akan diperkemas. Skim persaraan swasta akan dihebahkan sebagai pelengkap kepada skim yang sedia ada. Selain, itu, program bantuan sosial sedia ada akan diselaras untuk memperkukuh perlindungan sosial bagi warga emas. Inisiatif ke arah pemantapan dan pengukuhan perlindungan sosial di Malaysia telah pun diaktifkan melalui pengaktifan semula Majlis Perlindungan Sosial Malaysia (MySPC) yang diterajui oleh Unit Penyelarasan Pelaksanaan di Jabatan Perdana Menteri, (ICU JPM). Perkara ini perlu diperincikan pada peringkat



Jawatankuasa Kerja Insurans Sosial (JKSI) di bawah MySPC yang diterajui oleh MOF.

Program di bawah KWSP serta pelaksanaan sekuriti persaraan (*retirement security*) wajar diteliti di peringkat KWSP selaku Agensi Pelaksana dan MOF selaku Kementerian yang bertanggungjawab ke atas program-program insurans sosial di Malaysia selaras dengan peranan MOF sebagai peneraju JKSI di bawah MySPC.

Walau bagaimanapun, selain pendekatan penyediaan program insurans sosial, KPWKM berpandangan bahawa peranan keluarga perlu diperkukuh bagi meningkatkan kesejahteraan ahli keluarga selaras dengan tahap kebertanggungjawaban terhadap semua ahli keluarga termasuk warga emas, membudayakan amalan ihsan yang memupuk semangat kebersamaan keluarga, memastikan suasana harmoni dapat dikecapi keluarga serta menyemai sikap berkhidmat kepada keluarga bagi membantu ahli yang memerlukan bantuan seperti yang diterapkan dalam pendekatan 'Keluarga Malaysia'.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : Y.B. TUAN SIM CHEE KEONG  
[BUKIT MERTA JAM]**

**TARIKH : 15 MAC 2022 (SELASA)**

**SOALAN**

**TUAN SIM CHEE KEONG [ BUKIT MERTA JAM ]** minta **MENTERI KEWANGAN** menyatakan jumlah subsidi petrol mengikut jenis petrol mengikut pecahan setiap tahun dari 2013 sehingga 2021.

**JAWAPAN**

**Tan Sri Yang di-Pertua,**

Sebagai Kerajaan yang peka dan mengambil berat ke atas kesejahteraan rakyat, subsidi bagi produk petroleum disediakan bagi mengelakkan pengguna terkesan dengan kenaikan harga pasaran sebenar produk petroleum di peringkat global.

Jumlah keseluruhan subsidi yang telah ditanggung oleh Kerajaan ke atas produk petroleum bagi tempoh 2013 sehingga 2021 adalah sebanyak 75.14 bilion ringgit. Jumlah ini merangkumi perbelanjaan subsidi bagi produk petrol sebanyak 33.8 bilion ringgit, diesel sebanyak 24.58 bilion ringgit dan gas memasak atau *liquefied petroleum gas* (LPG) sebanyak 16.73 bilion ringgit.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KE-EMPAT BELAS**

**PERTANYAAN : JAWAB LISAN**

**DARIPADA : YB TUAN CHAN FOONG HIN  
[ KOTA KINABALU ]**

**TARIKH : 15 MAC 2022 (SELASA)**

**SOALAN NO. 73**

**TUAN CHAN FOONG HIN [ KOTA KINABALU ]** minta **MENTERI PENGANGKUTAN** menyatakan sama ada Kerajaan bercadang untuk menjalankan kajian fisibiliti pembinaan rangkaian kereta api menghubungkan Sarawak, Brunei, Sabah dan Nusantara, ibu kota baru Indonesia.

**JAWAPAN**

**Tuan Yang di-Pertua,**

Kementerian Pengangkutan mengikuti rapat perkembangan ibu kota baharu Indonesia iaitu Nusantara di Kalimantan Timur dan impaknya terhadap sektor pengangkutan di Sabah dan Sarawak. Pada ketika ini, pihak Kementerian belum mempunyai cadangan untuk melaksanakan *feasibility study* bagi pembinaan rangkaian kereta api menghubungkan Sarawak, Brunei, Sabah dan Nusantara, ibu kota baharu Indonesia. Di Sarawak, tumpuan sedang diberikan kepada penyediaan rangkaian rel bandar di bawah Projek Kuching Urban Transport System (KUTS) yang diterajui oleh Sarawak Metro manakala di Sabah, tumpuan diberikan kepada penambahbaikan infrastruktur kereta api serta mutu perkhidmatan kereta api Sabah yang diterajui oleh Jabatan Kereta Api Negeri Sabah (JKNS).

Sekian, terima kasih.